

MUNHU ARI KUTIZA

KUBVA MUHupo HWA SHE

Ngatikotamisei misoro yedu. Mwari vanodikanwa, tiri kufara masikati ano nemukana uyu watinawo wekuungana kwedu pamwe chete zvekare. Uye iMi moga, Ishe, munoziva kuti moyo yedu yanga iri kushuvira sei nguva ino iyo yatinokwanisa kumira pamberi pevanhu veNyu zvekare pano, uye tounza Mharidzo ino iyo yatinonyatsonzwa zvakakosha kuti ndeye chimbi-chimbi kwazvo munguva ino. Makatigovera mazuva mashoma aya zvino, uye tinonamata, Mwari vanodikanwa, kuti ruoko rweNyu rwetsitsi rwuve pamusoro pedu, kutitungamirira nekutiratidza gwara. Uye tipeiwo zvinhu izvo zvatoshaiwa, Ishe, nokuti moyo yedu inoshuvira kuKuzivai zviri nani.

² Tinoona munda mukuru wegoho, wachena, waibva, uye toziva kuti gorosi ragadzirira zvino kuitira nguva huru yekupura. Mwari vanodikanwa, tinonamata kuti Muchakwatanura makwande kubva patiri, itai kuti tigare muHupo hweMwanakomana zvino, ano mazuva mashoma aya ari kutevera, uye toibva zvokuve muHumambo hwaMwari.

³ Ropafadzai rwiyo rwese rwuchaimbwa. Ropafadzai munamato wose, uye mugopindura wese uchanamatwa, Ishe. Ponesai vose vakarasika. Danai kuti vadzoke kuimba yaMwari anorarama, uye nepakuwadzana, avo vakatetereka vachienda kure.

⁴ Tinonamata, Mwari, kuti Mugopodza munhu wese anorwara anouya pasi pedenga redu. Zviitei, Ishe. Dai pakashaikwa ane hutera pakati pedu pakupera kwemisangano ino.

⁵ Zvino, Mwari vanodikanwa, zvino kuitira isu pachedu, isu vacho tinozvidana munguva ino kuva Chechi, avo Vakadanwa, avo vari pasi rose vakabuda kubva muBhabhironi uye kuti vagova vadyi vekuwadzana kunoshamisa uku muzuva rino rekupedzisira, tinonamata, Mwari, kuti Mugoropafadza moyo yedu nenzira iyoyo. Zvirokwazvo tine nzara, Ishe, uye takaburitsa kubva matiri zvinhu zvose zvenyika, zvatinoziva nezvazvo. Ishe, takaisa padivi zvose zvinorema izvo zvinongotishungurudza zviri nyore, uye zvino ngatimhanyei nhangemutange iyi nekutsungirira, iyo yakaiswa mberi kwedu. Zviitei, Baba. Uye dai tava Makristu awedzera kuzara, awedzera kusimba, ari nani, pakupera kweshumiro ino, kudarika zvatanga tiri patapinda. Dai Mwari vawana kubwinya kwose, nokuti tazvikumbira muZita rajesu. Ameni.

⁶ Ndinofunga kuti uyu mukana mukuru kwazvo, manheru ano, wandagara ndakamirira kwechinguva. Rimwe zuva ndakanga ndichiudza mudzimai wangu, ndikati, “Ndinohutahuta kwazvo, ndakamirira kuenda kutabhanakeri.” Ndinongo... Ndine dzimwe shamwari, ndizvozvo, ndinadzo, kupoteredza pasi rose, asi pane chimwe chinhuwozve maererano netabhanakeri ino pano.

Ndakatorwa kubva muguruva rino remunharaunda ino, apo Mwari pavakandipa hupenyu pano panyika; uye ndinofungidzira, kana Akanonoka, ndichavigwa pano pane imwe nzvimbo. PaAchauya, Achandiwana pano pane imwe nzvimbo.

⁷ Asi, zvinoita sekunge, pane chimwe chinhu, pandinotanga kufunga nezveJeffersonville. Rimwe zuva ndakava nekusurukirwa kwazvo; ndakati kumudzimai wangu, ndakati, “Ndiri kusuwa kumba, uye handizive ndiri kusuwa kumba nokuda kwei, ndokunge vasiri vanhu vaye vari kundinamatira.” Ndakati, “Zvakanaka, ndicha... Chinhu choga chandinoziva chekuita kudzokera zvino ndova nemazuva mashoma emusangano, toona kana tingasakwanisa kuwana chimwe chinhu kubva kunaShe, zvime Vanoda kuti tizive chimwe chinhu.”

Uye chidzidzo chikuru, chakakosha chatinacho pamberi pedu zvino ndiko *Kuroorana NeKurambana*. Zvino kana pane mubvunzo, panofanirwa kuva nemhinduro. Hapagone kuva nemubvunzo kunze kwekunge pane mhinduro. Hazvinei nekuti chimbori chii, panofanirwa kuve nemhinduro. Kana Ishe vachida, ndinoda kuedza kutaura pamusoro paizvozvo, Svondo mangwanani.

⁸ Uye zvadaro, mangwana manheru, ndinofunga tichange tiri kumusoro kuno ku... Chikoro chiya chinonzi chii? [Hama Neville vanoti, “Parkview.”—Mupepeti] Odhitoriyamu yeParkview. Matii, changamire? [“Parkview Junior High.”] Parkview Junior High. Vangani vanoziva kuti chiri kupi? Zvakanaka, ndinodaira kuti vachaisa zvikwangwani kunze, handiti here, Hama Neville? [“Hongu.”] Chiri... Chinongori pamusoro pano apo pangaita—pangaita zvikamu zvitatu kubva muzvina zvemaira, uye pachange pane chikwangwani. Munokomuka muchidzokera shure, muchisiya mugwagwa. Chivakwa chakanaka, chakasimukira. Chine nzvimbo idzo dzamunokwanisa kuisa ruoko rwako rwakatambanuka, wonyora manotsi ezvaunenge uchida kunyora, ne—ne—nezvimwe. Uye ndine chokwadi chokuti muchazifarira zvakati nyanyei kupfuura zvamaizova, makaita sokumanikidzana mumisangano pano mu—mutabhanakeri. Pachave nenzvimbo yakawanda, nzvimbo yakawanda yekupaka motokari.

⁹ Zvino, ndinofunga vane mutemo muduku watakavimbisa kuti tichatevedzera, wokuti, tisazouyi panharaunda kusvika dzingaita six-thirty. [Hama Neville vanoti, “Kwete kusvika five-thirty; hatifanirwi kuwapo five-thirty dzisati dzakwana.”—Mupepeti] Uye nenguai... [“Mikova inovhurwa nasix-thirty.”] Ndinotenda kuti ringava zano rakanaka kuti isu tisvikepo nasix-thirty.

Zvino, vane imwe odhitoriyamu muno muguta inogara vanhu zviuru zvitanhatus. Kana tikava vakanyatsonaka pane ino iyi, vanogona kutiita kuti tiwane imwe yacho pane imwe nguva kuitira musangano wakakura, zvichida imwe nguva muzhizha rino apo pandinenge ndadzoka kubva mhiri kwemakungwa.

¹⁰ Uye saka ndinofunga tinokwanisa kuisa vanogara vanosvika kune... Tinokwanisa kuisa vanogara vanosvika vangani imomo? [Hama Neville vanoti, “Tinokwanisa kuisa vanogara vangaita zviuru zvina.”—Mupepeti] Zviuru zvina. Saka, munoona, tichava nenzvimbo yakawanda. Pachange pasina chokumhanyira. Zvino saka huyai nasix-thirty. Uye zvadaro munhu wese anokwanisa kuuya panguva yakafanira, munhu wese pamwe chete, uye ndine chokwadi chokuti mucha—muchava nepekugara pakanaka. Uye pakasimukira *seizvi*, uye—uye nenzvimbo pano paunogona kunyora uye wonyora manotsi ako pasi, nezvimwe zvakadaro. Uye zvichatanga, kana Ishe vachitendera...

¹¹ Ndinofunga zvino, manheru ano, uyu zvauri musangano wemunamato wemanheru eChitatu, tine... Nzvimbo yava kuda kutozara, saka ndinofunga zviri nani tikatanga mangwana manheru. Takairenda tingori netarisiro yokuti zvime, kana taizosvika pokuti taizozarisa pano, taizogona kuenda kumusoro ikoko. Asi ndinotenda zviri... zvinozenge zvakanakisa kwazvo kuenda kumusoro ikoko, hamufungewo kudaro here, hama Neville, kuenda kumusoro ikoko mangwana manheru? Uye vangani vanofunga kuti ringava zano rakanaka? Uye zvadaro munozova ne—nenzvimbo yakawanda. Ya—yakabhadharirwa rendi; yakabhadharwa nedzimwe hama pano dzemuchechi. Zvinongotidhurira madhora makumi mashanu pahusiku humwe chete, zvinova zvakanyanya, kwazvo... Ndinoshuva kuti dai ndaive naizvozvo kwese-kwese, ndichigona kuita kuti vakawanda zvakadaro vanogara pahusiku humwe chete nemadhora makumi mashanu, chivakwa chitsva chaicho, puratifomu yakanaka. Uye, asi tiri...

¹² Ndizvozvo, tichatora mupiro, ndinofunga kudaro. Uye hatidi kuti varume ava vaibhadharire vega pachavo; tichabhadharira... tichavabhadhara. Asi kana tichinge tabhadhara zvinoda kubhadharwa nezvimwewo, zvakanaka, ipapo, zvadaro, tinobva tamira kutora mupiro. Hati...

¹³ Kana pane vaenzi vari pamwe chete nesu, takachiita chitsidzo, kuti tisambofi zvachose takapemha, kukumbira,

kana kumanikidza vanhu kuti vatipe mari. Tinofambisa ndiro yemupiro, zvinongova... Ichi chiitiko chekunamata. Ndakazviedza, kakawanda, kuti ndisatombofambise ndiro yemupiro, zvachose, asi hazvishande. Maona? Nokuti, kupa chikamu chekunamata kwedu. Chikamu chemungava wedu. Hazvinei kana rikangove shereni roga, kana kuti chingave chii hacho, kana kobiri, ndizvo zvose...

¹⁴ Saka munorangarira, Jesu akaona chirikadzi ichidarika, rimwe zuva, apo varume vakapfuma vaiisa hupfumi hwavo hwakawanda umo maichengeterwa mari. Zvino chirikadzi iyi yakadarika nepo, zvichida pane vana vaduku, vashoma vane nzara vachifamba padivi payo, uye ndokupa zvose zvayakanga inazvo, makobiri matatu. Zvino Jesu ndokuti, “Ndiani abvisa yakawandisa?”

¹⁵ Zvino, dai ndainge ndakamira ipapo, ndaiti, “Musazviita, hanzvadzi. Isu—isu, tarirai, tine mari yakawanda.” Asi haAna kuirambidza. Maona? A—Aiziva kuti Aive ane chimwe chinhu chayo chikuru zasi kwenzira. Saka, munoono, zvisinei, yaiva nemusha muKubwinya, uko kwayaive iri kuenda. Uye haAna kuirambidza. Akairega ichiisa makobiri ayo matatu, nokuti ndizvo chaizvo zvayainge ichida kuita. Uye yaitofanirwa kuda kuzviita; iine vana, uye iri chirikadzi, uye ine makobiri matatu chete ekurarama nawo. Iyo, yaitofanirwa kuda kuzviita. Saka, muri kuona, kana vanhu vachida kupa, munofanira kuvapa mukana wacho wekuzviita.

¹⁶ Asi ndinofunga pamusoro peava vakamira, uye nevanhu vachiti, “Ndiani achapa madhora makumi mashanu? Ndiani achapa madhora makumi maviri?” Ndinofunga kuti hazvinyatsoita zvakanaka kune—kune njere dzako. Ndi—ndinofunga kuti vanhu vanocherechedza kuti zvinotora mari ku—kuita mu—musangano. Uye handaimbovatendera kuzviita, mamaneja. Ndakati, “Pose pamunozenge mafanirwa kuita izvozvo, ipapo inenge yakwana nguva yekuti ini ndidzokere kutabhanakeri. Saka, hatifanirwe kuzviita izvozvo.” Asi ndi—ndinofunga kuti tinofanira kufambisa ndiro yemupiro, ku—kuitira kuti tiiite shumiro yekunamata yakakwana.

¹⁷ Uye saka zvichida vachafambisa ndiro duku yemupiro manheru oga-oga, votaura chimwe chinhu sokuti, “Zvakanaka, tave kutora mupiro zvino.” Zvino vachafambisa ndiro yemupiro, uye ndiwo—ndiwo achave magumo acho.

¹⁸ Uye manheru ega-ega, kana Ishe vachida, ndinofunga kuti Ishe vakaisa pamoyo pangu Mharidzo yakananga yeChechi. Ndanga ndiri mumunamato kwemazuva akawanda. Uye handisi kuzopinda mazviri, nokuti chimwe chinhu chikuru chinoshamisa chakaitika rimwe zuva chakanga chakakura zvikuru. Uye ndiri kushuvira zvikuru kuti ndikutaurirei pamusoro pacho. Uye zvino, chidzidzo chikuru, ndinodaira kuti,

icho vazhinji vavo, Billy akati, kune vanga vachifona, zvaiva pamusoro pe*Kuroorana NeKurambana*. Icho, chinova icho chidzidzo chikuru—chikuru, uye nda—ndakanga ndisingazine kuti ndinochisvikira sei. Zvino ndakaenda kumusoro kunonamata nezvacho, uye Ishe vakasangana nen. Uye ndinoziva kuti ini, ne...ini handinacho, asi Mwari vakapa kwandiri; ndava nacho zvino. Mwari vakandipa mhinduro chaiyo, munoona, munoona, uye ndi—ndinoziva kuti ichokwadi.

¹⁹ Zvino saka handisati ndava kunyatsoziva chaizvo zvino, zvichida, Svondo ndinogona kukumbira hanzvadzi dzedu kuti dzirege kuuya kumusangano, ivo pachavo, asi handi—ndizive. Zvichangoenderana nekuti kana madzimai akaroorwa vachida kuuya nevarume vavo. Pane—pane zvime zvinhu zvakakosha kwazvo zvinofanira kutaurwa, chokwadi chezviri pamusoro, uye kuti sei... Uye saka tinoda kunyatsozvitaura zvichibva, muna ZVANZI NAJEHOVHA, zvadaro munenge mava nazvo zvino. Munozonyatsoziva kuti Chokwadi ndechipi ipapo. Uye ndiri kuvimba na Ye kuti achazviita.

²⁰ Uye, zvino, ndakanga ndiri kumusoro kuno murestorandi rimwe zuva, ndichidya, uye—uye Jerry nevamwe vese vachikutarisrai mese. Vakataura, ndokuti, “Zvakanaka, isu...” Vamwe, mumwe wevakomana akanga akamira, akati, muchinda uyu akati, “Ndichanyatsoita zvakanaka kwazvo vhiki rino,” akati, “vane...Kana kuti, mavhiki maviri anotevera aya.” Akati, “Vane mu—musangano pano, webasketball, kana chimwewo chinhu.” Akataura, zvino ndokuti, “Branham ari zasi uko, achange aine musangano.” Iye akati, “Ndichapa zvokudya kune vanhu vakawanda kwazvo.” KuRanch House, imwe yenzvimbo dziri kumusoro uko. Uye vanga vari... vanga vakanaka kwazvo.

²¹ Uye ndinokukoshesai imi mose, nokuti zvirokwazvo vanga vachidada uye nokutura zvinhu zvakanaka pamusoro penyu.

²² Maneja vari kumusoro uko kuRanch House vakasangana nen mamwe mangwanani. Ndakapindamo nenguva dzingaita two-thirty, ndichibva kuArizona. Zvino akati, “Zvakanaka, Hama Branham,” akati, “Ndanzwa kuti muri kuzova nemumwe musangano.” Akati, “Ndava nevamwezve vanobatsira,” iye akadaro. Uye akati, “Zvino ndinoda kutaura chinhu chimwe chete, chokuti vanhu avo vanobva zasi uko,” akati, “ivo vanhu vakanaka kwazvo.” Zvino, izvozvo zvakandiita kuti ndinzwe zvakanaka kwazvo pamusoro penyu, munoona.

Nokuti, chaizvoizvo, ndinoita sokunzwa kuti muri pwere dzangu, uye ini—in...kana kuti, vana, waro. Uye saka ini... Pwere [Pwere zvinoreva mwana wembudzi kana mwana wemunhu muChirungu—Muturikiri] zvintonaura pamusoro pembudzi, zvino imi hamusi mbudzi. Muri makwayana angu. Zvakadini izvozvo? Muri makwayana aShe ayo aAkandipa

kuti ndipe zvokudya. Uye ndinovimba kuti zvicha—zvicha...
kuti Achanditendera kuti ndizviite. Tiri kuenda tichidzika nemugwagwa.

²³ Zvino pamusoro peuku *Kuroorana NeKurambana*, ndakange ndichida kutaura pamusoro pako kubvira panguva iya yeZvisimbiso zviya Zvinomwe. Munoziva, chakava... Zvakavanzika zvose zvaifanira kuziviswa mazviri, kuzarurwa kweZvisimbiso Zvinomwe, zvakavanzika zvose zvemuBhaibheri. Uye ndiri kufunga zvino, ndave kuita sekukwegura, ndi—ndinofunga kuti ndi... Ndakafunga kuti zviri nani ndikangoita kuti ndizviise patepi, kunyangwe kana chimwe chinhu chikazoitika kwandiri, zvino Chechi inogona kunetseka, “Hatizive kuti chii chavaiva nacho mupfungwa mavo? Vaizotaura kuti kudini?” Uye nezvimwe zvidzidzo zvose zvinoita sezvakaoma kwazvo; ndinofunga, ne... nekubatsirwa naShe, ndichaedza kuzviunza kwamuri. Uye ipapo—ipapo kana pakaitika chimwe chinhu, uye kana zvikaitika kuti ndinoenda Asati auya, mu—munenge munazvo zvino zvakarekodhwa ipapo.

²⁴ Ndinofunga tine mamwe mabhuku matsva akabuda. Ndiri kuona Hanzvadzi Vayle; handizive kuti chiremba vari pano here kana kuti kwete. Vari pano here, Hanzvadzi Vayle? Zvichida varimo mumusangano. Handisi kuvona. Asi, oo, hongu, vari kumashure-shure chaiko. Zvino Hama Vayle vakanyora bhuku, uye raka... Ndafunga, ndinotenda nhasi vati, maviri. Hama Vayle, ndizvozvo here, mune maviri pano iye zvino? Mabhuku maviri. Zvino, handizive, ini... Kuzvinzwisisa kwandiri kuita, ndekwekuti munhu mumwe nemumwe anowana rake. Saka ini... Kana iwe... Ndiwo manzwisisiro andiri kuita. Ndinogona kunge ndiri kukanganisa pazviri.

²⁵ Uye zvadaro *Mazera Manomwe EKereke* rakapedzwa (Ndizvo here, Hama Vayle?) uye riri kutodhindhwa zvino. Uye ndinoziva kuti munoda kuawana, nokuti anopindura mibvunzo yakawanda yanga iri mumoyo menuy. Zvino ipapo shure kwaizvozvo, zvakanaka, tichaedza kuita kuti *Zvisimbiso Zvinomwe* zvizarurwe, munoziva, mabhuku, kuitira kuti mumwe nemumwe agone kuverenga muchimiro icho chava—icho chavanoda, chavanogona kunzwisisa pamwe nekunzvera. Ndinofunga kuti kana zvanyorwa, kana izvo...

²⁶ Kutanga, takazvitora zvichinyatsobva patepi, manyorerwo azvakaitwa kana kutaurwa. Munoziva, unogona kuparidza mharidzo, ndechimwe chinhu, uye zvadaro kuzonyora bhuku ndechimwewo. Muri kuona, sezvandingaite ndichibata chimwe chidzidzo, sezvandingataure kwamuri, munogona kunzwisisa, ndoti, “Zvino, mbeu yenyoka,” maona.

Saka, zvino, muverengi webhuku iroro, kana wazvibvisa izvozvo, anozonetsekana, “Mbeu yenyoka chii?” Maona? Zvino havazoziva. Kana zvikaitika kuti zvinoenda munzvimbo iyo

yakaita sePrinceton kana kumwewo, uye va—vanozofunga kuti taive vanhu vasina njere.

Saka ndakaita kuti Hama Vayle vaite sekundibatsira pane izvozvi uye vachichengeta mutsara wepfungwa yacho iri imwe chete, uye vozvipa matauriro akafanira. Uye ndine chokwadi kuti matauriro angu vanozo... Anozova chakavanzika kwavari, chokwadi chaicho. Saka ha... Hama Vayle vanozvigona izvozvo zvakanyanya, saka ivo vari se...

²⁷ Uye zvadaro, mazviri, ndinofunga kuti hama yedu yakakosha inogona kunge yakawana kamwezve kakufemerwa kaduku, neimwe nzira, zvino ndokuti vari kuzonyora mabhuku avo pachavo akati kuti, achibva paari, tingati. Zvino saka vakanyora rimwe rintonzi, ndinotenda, *Muporofita Wechizvarwa Chokupedzisira*, nerimwe racho, *Chechi YeRaodhikia*, ndinotenda, kana chimwewo chakada kudaro.

²⁸ Uye Billy andiudza kuti, manheru ano, kuti ndinotenda zviuru zvakawanda zvawo zvasvika nhasi; mumwe munhu aaunza kubva kuTexas. Uye saka, iwo, achange ari pano. Uye vachazvizivisa, ndinofunga, chero zvaari. Ndinofunga pane vakaabhadharira. Handina hangu chokwadi. Zvino kana akadaro, achaZopihwa kwamuri, muri kuona, zvekare, pachena. Uye tine tariro yekuti ucharifarira. Uye kana ukadaro, gwinha Hama Vayle ruoko kumashure uko uye wovataurira kuti unorikoshesa zvakadini. Handisati ndariverenga, ini pachangu. Kana ndikazoaverenga, ndinogona kushandura pfungwa yangu pamusoro pazvo, saka ndichaedza kuaverenga vhiki rino apo pandinenge ndine mukana, kana ndikakwanisa.

²⁹ Zvino zvaari manheru emusi weChitatu, musangano wedu unotanga mangwana manheru zviri pamutemo. Asi ndinofunga, mukuva pano pakati penyu, nda—nda—ndatotadza kungogara kumusoro uko kumba uye—uye ndichiziva kuti imi mose muri zasi kuno. Ini... Sezvakangoita, munoziva, sezvakaita vamwe vehama dzako vakauya, munoziva, zvino unomhanya uchidzika nenzira kuti unosangana navo, munoziva. Zvino—zvino nda—ndafunga kuti ndingomhanya ndichidzika uye—uye ndigokuchingamidzai kuJeffersonville. Uye saka vhiki rino rapfuura ini ndikango...

Kwete, ndinokumbirawo ruregerero, ava kuda mavhiki matatu apfuura, ndauya kumba. Ndanga ndiri kunze ndichidzka ku... Ndanga ndiri pane mimwe misangano ndichidarika nemuArizona umo, zvino ndokudzoka kuti ndiedze kuzorora. Zvino ndakaenda parwendo rwekunovhima, uye nda—ndakawana shumba yakakurumbira kudarika dzose mudunhu reArizona. Ndakaimhanyisa nemumiti mamaira makumi maviri kuti ndiiwane.

³⁰ Asi ipapo kufunga, kudaro, kuti handina kumbofunga apo pandakanga ndiri kamukomana kaduku... Kuti ndingoratidza

kuti zvinhu izvi zvinoitika sei, kanzvimbo kaduku ako Ishe vakanipa kumusoro uko, kwemwedzi yatiri kunze ikoko, uye nechikoro chevana.

Ndakanga ndiri kamukomana kaduku. Ndinodaira kuti Jimmy Poole ari pano manheru ano, zvime baba vake vari pano, Jim muhombe. Takaenda kuchikoro pamwe chete, uye ndinorangarira ndakagara ipapo, sekamukomana kaduku kaive nemataridzikiro anosiririsa, uye neshangu, ndakapfeka shangu dzetenisi, zvigunwe zvikuru zvakabuda kubva madziri; ndokumbira chidimu chebepa kubva kune mumwe, uye penzura kubva kune mumwewo.

³¹ Ndaiwanzonyora nhetembo. Uye Mai Wood, pano, vandiita kuti ndiidetembe masikati ano patepi, pamusoro peFord yangu yakare, munoziva, uye iyoyo yaka—yakanaka. Zvino, vati, “Saka, munofanira kuitumira kuna VaFord.”

Ini ndikati, “Pane chokwadi chakawandisa, ndinotenda,” pamusoro pehungwenjere-ngwenjere kumberi, nekugayana kwesimbi kumashure, uye nechimudhiraiyho chinonetsa sechirahwe chechiChina. Asi ini... Yaka—yaka... Asi ndakagara ndichiti, chinhu choga chandaizoita kuverenga matayi mana, uye ndoizunguza zvakakwana kuti imuke uye zvadaro ndopinda mairi. Ndakati, “Yinge yakanaka pandaitanga kukwira chikomo nayo, yaienda ichinyatsodhonza zvishomanani, ichiti, ‘ndinofunga kuti ndinokwanisa, ndinofunga kuti ndinokwanisa, ndinofunga kuti ndinokwanisa.’ Zvadaro ndotanga, kune rimwe divi, ichiti, ‘ndafunga kuti ndinokwanisa, ndafunga kuti ndinokwanisa.’”

Ndiyo nzira yatinokwira nayo chikomo chacho, sa *Pilgrim’s Progress*. Saka isu...

³² Ndakanga ndine kanhetembo kaduku kandakanyora, zvakaita seizvi. Uye ndakati... Zvino, ingofungai, ndakanga ndiine makore angaite gumi nemaviri bedzi ekuberekwa. Uye ndakamira kumusoro ikoko, rimwe zuva, ndakatarisa kumusoro kwemupata uya; uye ndichifunga, “Shumba iya ichange yakagara imo muno chaimo muden room muno, yakatarisa kunze nepahwindo,” muhwindo regirazi. Ndakanga ndichifunga nezvekanhetembo kaduku. Ndakadzokera ndikanokasimudza, zvime zvakada kudai. Ingofungai kuti Mwari ...

³³ Munotenda here kuti Mwari vari mukufemera kwose? [Ungano inoti, “Ameni.”—Mupepeti] Mwari vanotonyora chimbo. Munotenda here kuti Mwari vari munziyo? [“Ameni.”]

Jesu akataura kudaro. Akanongedzera shure kuna Dhavhidhi, “Hamuzive here zvakataurwa naDhavhidhi muMapisarema? Munoziva, hazvina here...”

³⁴ Tarisai pakurovererwa chaipo. Dhavhidhi akazviimba, muna Mapisarema 22, “Mwari vaNgu, Mwari vaNgu, ko MaNdisiireiko? Mapfupa aNgu ose, vanoNditarisa.

Vakabvowora maoko aNgu netsoka dzaNgu.” Munoziva, zvino urwu rwakanga rwuri rwiyo. Mapisarema rwi—rwiyo.

³⁵ Uye munhetembo iyi, ingotarisai kuti zvakasvika pakuitika sei. Ndakagara ipapo, ndiri mwana muduku wakare aine chidimbu chebepa rekukwereta, ndakati:

Ndakasurukirwa, oo, ndakasurukirwa
zvakanyanya nokuda kwenzvimbo iyo iri
kure-kure kumawodzanyemba kwakadziva
kumadokero,
Apo mimvuri inowira pasi zvakadzamisa pari
pamusoro pegomo.
Ndiri kuona gava richingombeya kwese-kwese
muunyirinyiri une ruvara rwepeporo;
Ndiri kunzwa mhumhi ichizhambatata zasi
uko kunofura mombe dzenyangga refu.
Uye pane imwe nzvimbo kumusoro
uko kwemupata ndiri kunzwa shumba
ichichema,
Mune aya Makomo eCatalina ari kure-kure
pamuganhu weArizona.

³⁶ Makore makumi mana azotevera, ndakagara ipapo chaipo pamupata wacho, shumba yacho yakanditarisa kumeso.

O Mwari, pane Nyika iri mhiri kwerwizi pane imwe nzvimbo, vashamwari. Inongo...Inofanirwa kuveko. Maona? Pane—pane kutaura kwakanyanyisa pamusoro payo. Zvinhu zvose izvi hazvisi ngano; ndezve...Ndezve mazvirokwazvo. Zvitori zvemazvirokwazvo. Ndinofara kwazvo kuva pano manheru ano, kuva pamwe chete nevanhu ava vandiri kutarisira kuzogara navo mhiri Ikoko nokusingaperi, uko kusingazombova neurwere, kana rufu, kana kupatsanurana. Uye kuenda parwendo hapana zvakuchazenge kuri kwatiri ikoko.

³⁷ Zvino, ndinofunga kuti hapana musangano ungave wakakwana pasina kuverengwa kweShoko uye nekuva nezvishoma...

Hama Neville, ndangofamba ndichikwira kumusoro kuno. Billy ati manga muchida kuti nditaure. Zvanga zviri izvo here, Hama Neville? [Hama Neville vanoti, “Ameni. Hongu. Chokwadi.”—Mupepeti] Ndinogona kungojairirwa zvakati nyanyisei, asi nda—ndangonzwa zvakanaka kwazvo pamusoro pazvo. [“Zvakanaka, ameni! Chokwadi daroi henyu!”]

Saka, zvino, imi mune nziyo uye nezvimbewo, onai Hama Neville kana mava kuzoimba, uye zvadaro mozongozviita, kumusoro uko. Uye mongove nezvingaita hafu yeawa yezvepakutanga, uye ngatipindei chaimo muMharidzo idzi dzakanyatsodzika uye toona zvatinogona kuona Ishe vachizoita. Uye ndinongovimba...

³⁸ Ndi—ndinotenda tine Chokwadi. Ndakagutsikana nazvo izvozvo. Ndinotenda gorosi riri, chaizvo-izvo, chikwande chiru kubva pariri. Munoziva. Uye, muri kuona, ndinogona kupa kanhangaruvanze kadiki pane izvozvo, mangwana manheru, munoona, kuti chikwande chiru kuzvibvisa sei kubva pagorosi. Asi gorosi rinofanira kugara muHupo hweMwanakomana, kuti riibve. Uye ndizvo zvatauya kuzoita pano, shamwari, kugara muHupo hweMwanakomana kusvikira kaboka kedu kadiki kevanhu pano, kusvikira kanyatsoibva kuna Kristu, kova chingwa patafura yaKe. Ndizvo zvandiri kuda kuti kaite.

³⁹ Uye zvino tisati tasvika paShoko, shure kwekudetemba, nezvimwe zvakadaro, ngatinamatei zvekare. Zvadaro tichatora patichazoverenga.

⁴⁰ Jesu anodikanwa, tibatsireiwo manheru ano zvino, mumashoko mashoma aya, patinenge takamirira paMuri. Uye tinonamata kuti nyasha netsitsi dzeNy whole zvigova nesu, Ishe. Uye nyevenutsai moyo yedu; bvisai makwande ose, minzwa, nerukato, itai kuti mushana wezuva raMwari wakaropafadzwa uwire mukati paShoko, Ishe. Uye dai tikava nemusangano mukuru kusvikira hapazove nemunhu asina kuponeswa pakati pedu, vana vose vanenge vave muHumambo hwaMwari. Avo vasina rubhabhatidzo rweMweya, dai vakaUgamuchira, Baba. Dai zvakavanzika zvikuru zvose zvatiri kufanira kuziva muzera rino, Ishe, zvazarurwa kватири; uye tichazoona kuve pachena kwamwari, kuitira kuti tigoziva kuti tinozvibata sei pamwe nemaitiro, tichizvigadzirisa pachedu uye nekuunza nhengo dzemutumbi wedu mukuteerera kuShoko, kuti tizive kuti tinorarama sei muzuva ranhasi pakuuva kwaIshe Jesu.

⁴¹ Pandiri kuverenga kubva muShoko reNy whole manheru ano, Ishe, ndingangogona, nedzidzo isina kukwana, kukwanisa kuverenga mune mamwe emashoko, uye zvichida ndotadza kududza mamwe acho zvakanaka. Asi, Ishe Mwari, ndimi moga munogona kuburitsa chidzidzo kubva imomo. Ndimi moga munokwanisa kuzviita. Hapana—hapana nzira iyo yekuti munhu angakwanise kuzviita; zviri mumaoko eNy whole, Ishe. Saka ipai kватири, usiku hwega-hwega, izvo zvinhu zvakavanzwa muShoko reNy whole, kuitira kuti tive Makristu ari nani uye kuti tirarame zvinoenderana nenguva yatiri kurarama mairi, semienzaniso yeChikristu. Tinokumbira muZita raIshe Jesu. Ameni.

⁴² Zvino, vazhinji venyu, mumaBhaibheri enyu, ndinoda kuti muvhure kuBhuku rajona. Raka... Tinogarotaura zvakawanda kwazvo nezvajona seuyo akadzokera shure nezvimwe zvese. Ndakagara ndichitsigira Jona. Handitende kuti Jona aive adzokera shure. Handi—nditende izvozvo. Ndinotenda zvinongova... Tinongozvishandisa dzimwe nguva, tichiti, “Iyeye ndijona.” Asi kana isu... Ndakatotaura nezvazvo

kare, neimwe nzira, ndichitaura kuti ndaifunga sei, Jona, izvo zvakaitika.

Zvino shoko raJEHOVHA rakasvika kuna Jona mwanakomana waAmitai, richiti,

Simuka, uye uende Ninevhe, riya guta guru, uye wonodanidzira uchipikisana naro; nokuti kuipa kwavo kwakwira pamberi pangu.

Asi Jona akasimuka achida kutizira Tashishi kuti abve pamberi paJEHOVHA, akaburukira Jopa; akawana chikepe chakanga choenda Tashishi: saka ndokubhadhara mari yacho yekufamba, ndokudzika achipinda mukati macho, kuti aende navo Tashishi achibva pamberi paJEHOVHA.

⁴³ Haasi magumo anosuwisa here aya? *Munhu Ari Kutiza Kubva MuHupo HwaShe*, zvino ndicho chidzidzo changu.

⁴⁴ Zvino, chokutanga tinoda kufunga pamusoro peizvi. Jona aiva... Chikonzero, chikonzero chikuru, icho chandinofunga kuti akaita chinhu chikuru ichi pano, ndechokuti Jona aiva muJudha. Uye akakumbirwa kuti aende kuguta remaHedheni, kuti anodanidzira achipikisana naro; achifunga kuti haaizogamuchirwa. Nokuti, maHedheni aizofunga kuti, "Ko muJudha uyu anei nechokuita nesu?" Asi, munona, chimwe chinhu, zvinotipa chimwe chinhu chikuru pano chekuti tione, kuti Mwari haangori Mwari wemaJudha chete, asi iYe ndiMwari wemaHedheniwo zvekare. Iye ndiMwari wevanhu vose.

⁴⁵ Iye akangosarudza maJudha. MaJudha vainzi vanhu vakasarudzwa naMwari. Vakasarudzwa nekuda kwechikonzero chakananga. Uye chikonzero ichocco chaiva, kuti vapihwe murawo, uye havana kugona kuuchengeta. Uye Akangoratidza, nevanhu ivavo, kuti murawo hawaigona kuchengetwa, uye kuti iYe aiva mwa—mwa—Mwari vekururama. Uye murawo waitodanira pave nekururama, asi pakanga pasina nyasha mumurawo, dzokuti munhu aburitswe kunze. Hapana mubhadharo wakabhadharwa nemurawo, asi zvakatora nyasha kubhadhara mubhadharo wach, kana kuti pasi peapo taive takaiswa nemurawo.

⁴⁶ Zvino Jona pano akadanwa, seizvi, mumwe wevaporofita vaduku vemuBhaibheri, kuti aende zasi kuguta iri.

Zvino pano tinowana muenzaniso wedu isu tose. Mumwe nemumwe wedu, tinogara tichitiza kubva kune chimwe chinhu. Tinotiza kubva kudambudziko. Tinotiza kubva pamingava yebasa. Isu, tose hedu tinokurumidza kuita saizvozvo. Isu, tiri, tinokurumidza kutiza kudarika kumira kwatingaitē tichitarisana nazvo. Munona, tinongo... Ti—ti—tinozviwana tichimhanya.

Dzimwe nguva tinozviwana tichikurumidza kutiza kubva pabasa. Hatidi kudaro, hatidi kushanda. Vamwe vanhu vanongofunga kuti vanogona kurarama vasingashande. Asi, ndinofunga, Soromoni ndiye akati tinogona kuwana mhinduro yacho pano, mukutarisa svosve.

⁴⁷ Munoziva, kasvosve kadiki, vanondiudza kuti kana svosve (rose) rikarega kushanda uye risingaunzewe mukati, svosve iroro haridyewo muchando imomo, zvekare. Saka, munhu wese anofanira ku—kushanda.

⁴⁸ Tine zvinhu zvakawanda zvatinofanira kuita, mungava wakakura kwazvo watinofanira kutarisana nawo. Munhu wese anofanira kutarisana nemumwe mungava.

⁴⁹ Pauno—paunosvika paku—kusarudza mudzimai wako, kuti uroore, kana kusarudza murume wako, u—unofanira kutora mungava wacho. Zvinoka unofanira kurangarira... Zvichida unovaka imba; imba inenge yakanaka kwazvo. Uye zvadaro, rangerira, semudzimai akaroorwa, unofanira kufunga pamusoro pemungava wekurera vana. Uye unofanira kufunga pamusoro pemadziro akanaka, anotsvedzerera kuti achange akadhindika tumawoko tuduku, twune tsvina pese-pese. Zvadaro une mungava wekudzidzisa vana vako. Une mungava wekupfekedza pamwe nekupa zvekudya.

⁵⁰ Zvinhu zvose zvinongova mungava webasa. Uye zviri nyore kwazvo, kana mingava yacho ichinge yatarisana nesu, kunzvenga tichibva pairi. Uye tinoona kuti muchato mungava, mukuita kwose.

⁵¹ Kunyangwe, nguva zhinji, tinoona... Izvi zvakaoma kuzvitaura, asi ichokwadi, kuti vashumiri, nguva zhinji, vanonzvenga mungava wekumira neShoko raMwari rechokwadi apo pavanenge vatarisana naRo. Vanonzvenga mungava iwoyo. Apo Chokwadi cheShoko raMwari pachinenge chaunzwu pachiso nechiso nesu isu vanhu, tine... tinenge tinokurumidza kudzokera shure kusvikira pachinhu chokupedzisira.

⁵² Ndichangopedza kutaura nemuzukuru wangu muduku kumusoro uko. Iye muKatorike, uye iye... Uye ndakabhabhatidza mukomana uyu, muZita rajesu Kristu, pano makore mashoma apfuura, zvino akatanga kufambidzana nemumwe musikana muduku ndokushanduka kuva muKatorike. Uye ndakabata ruoko rwaamai vake pavakanga vava kufa kumusoro uko. Ivo vakati kwandiri, mashoko okupedzisira, “Chengetai Melvin.” Zvino iye ange ari kungorota hope. Iye haasi kumbogona... Ose, mazuva ose, vhiki rapera, anga achirotu hope. Ndokuti, “Ndainge ndiri kufamba ndichipinda muchechi menyu, Sekuru Bill, zvino mainge makamira uko muchiparidza. Ndaimhanyira ikoko, kuti nditange kureurura. Ndaibva ndamuka.” Iye akati, “Nda—ndanga ndichikanganisa.”

Ini ndikati, "Melvin, haudi dudziro pana izvozvo. Nzvimbo yako iri zasi uko ndiko kwako." Ndizvozvo chaizvo. Maona?

⁵³ Asi kutarisana nemingava, dzimwe nguva zvinobvisa ganda chairo kubva patiri, kuti tizviite. Sababa, kuti mutarisane nemungava, wekushwapura mwana wenyu. Ivo vana vaduku ava, hamudi kuzviita. Asi sababa kana amai, munofanira kutarisana nemungava wekurera mwana iyeye, nokuti Bhaibheri rakati, "Ukaregedza kushandisa shamhu zvino unozojaidza mwanakomana wako." Uye zvichingori zvakanaaka mumeso enyanzvi yose yezvepfungwa irimo munyika. Izvi zvinongoramba zviri Chokwadi chaMwari. Dai paiva nekuitwa kwezvakadaro kwakawanda, hataizova nemisikanzwa yakawanda yevechidiki nezvimwe zvakadaro, pamwe nekuwora kwatinako munyika nhasi. Asi mutemo uye wekare wakakosha wemumba wakatyorwa, kare-kare, zvino vanorega vana vachiita chero zvavanoda.

⁵⁴ Asi kunyangwe sezvadataura, vashumiri, vanosvika pavanosangana chiso nechiso neChokwadi, zvino zvadaro vofamba vachibva paChiri. Munoona, vano—vanongova ... Zvinoita sekuti pane chimwe chinhu icho chava—vasingadi kutarisana nacho.

⁵⁵ Nguva dzakawanda ndakava nevanhu vakauya, vachiti, "Ndinoziva kuti ndizvo chaizvo, Hama Branham, asi kana ndikaita izvozvo, vanozondidzinga kubva muchechi." Zvinei izvozvo? Kana ukasadaro, vachazokudzingira kunze, kumusoro Uko. Saka unofanira kudzingirwa kunze, pane imwe nzvimbo, munoonaa. Saka unochofanirwa kutotarisana nazvo, pane kuti umhanye uchibva kwazviri uye wotii, "Zvakanaaka, ndichaenda nechekuno uku. Handidzokeri." Dzokera, chokwadi, teerera kune zvime zvakawanda zvaRo.

Nzverai Magwaro. Jesu akati, "Nzverai Magwaro, nokuti maAri munofunga kuti mune Hupenyu Husingaperi, uye iWo ndiWo anoNdipupurira." Asi tinoona kuti vanhu havagoni kutarisana nazvo.

⁵⁶ Vachinge vaunzwako, muHupo hwaMwari, uye munoonaa kana Mwari vakaita vimbiso, zvino Mwari vakasungirwa kuvimbiso iyoyo. Zvino paVanozadzisa vimbiso iyoyo, ipapo vanhu vanobva vatya kutarisana nemungava wekufambiliana neMharidzo yenguva. Tinozviona kwese-kwese izvozvo.

⁵⁷ Ko zvakadii nemi maLutherani? MaLutherani mangani aitya kuti, vanhu vaitya kutarisana neChokwadi chaLuther apo paakauya nekururamiswa? Tarisai kuti zvakakutorerai chii, zvichida hupenyu hwako chaihwo, kuti ubude uye uchipupura Jesu Kristu zvino—zvino wowa mu—muLutherani.

⁵⁸ Tarisai kwamuri imi maMethodisti, zvakanga zvichiitika kuti, imi mose maishevedzwa kunzi vaumburuki vatsvene. Ndinodaira kuti manga muchizviziva. Uye vaienda pasi

peMweya, uye vogwinha-gwinha vachidzokera kumashure nemberi. Zvino vakati vai—vaiva ne “kugwinha-gwinha.” MaMeth—...Avo, kwete, havasi maPentekosti; aya aiva maMethodisti, makore akawanda apfuura. Uye vaigwinha, vachizunguzika, uye vowa vari pasi pesimba raMwari. Zvino vaivamwaya mvura kumeso kwavo, uye vovapumha mhepo nezvinofefetedza, vachifunga kuti vainge vafenda. Uye, zvino, maioneckwa seboka revaumburuki vatsvene. Asi maiva mune, vanaamai navanababa venyu, vaifanirwa kutoti vaChigamuchire, votarisana neChokwadi nezvinhu zvechokwadi, kana kuti voiramba.

⁵⁹ Ko zvakadii nemi maPentekosti makagamuchira kudzoreredzwa kwezvipo, apo pakauya rubhabhatidzo rweMweya Mutsvene, rwune kutaura nendimi, pamwe nezvipo zveMweya zvichidzoka muchechi? Handiti, maMethodisti aida kukukavirai kunze, uye vakatozviita. Asi makatozomira makatarisana nazvo. Chimwe chinhu chamaifanira kutoita.

Ko zvakadii nenyaya iya, payakabuda, yerubhabhatidzo muZita raJesu Kristu, uye mukaona kuti chaiva Chokwadi? Munofanira kutarisana nayo, kana kuti moita chimwe chinhu pamusoro payo.

Une mungava webasa, munhu wese anawo, uye munofanira kutarisana nezvinhu izvi. Zvakanaka.

⁶⁰ Uye kana muchinge maona ipapo, muzuva rino zvino, apo Shoko raMwari rakaita vimbiso idzi dzezvinhu zvatiri kuona zvichiitika iye zvino, zvadaro tine mungava wekutarisana naRo kana kuti tobva paRiri. Une...Haugoni kugara uri pakati nepakati. Unofanira kuita chimwe chinhu pamusoro paRo. Ndokuti...Pane nhano inofanira kutotorwa.

Haugone kupinda nepamukova uyo wechechi uye wobuda uri munhu mumwe chete sokuuya kwawaita. Unenge wave zvichida kure zvakanyanya, kana kuti pedyo naMwari, nguva yose yaunopinda kana kuti yaunobuda uchienda kunze uko.

⁶¹ O, zviri nyore sei kuti vanhu vanzvenge zvinhu izvi. Uye ndinoda kuti tifunge pamusoro peizvi apo patinotanga kupinda mushumiro dziri muhuronswa mangwana manheru, kuti, ndinoda kuti mucherechedze kana chimwe chinhu chichinge chopikiswa, kana iwe...kana paine muvhunzo pamusoro pazvo. Kana paine muvhunzo pamusoro pazvo, panofanira kuva nemhinduro.

⁶² Toti, semuenzaniso, ndoti ndanga ndiri kuenda kumavirira, zvino iwe wondinongedzera *uko*. Zvakanaka, chinhu chokutanga unoziwa, ndinozomhanya ndichipfuirira kwandinofanira kunanga, uye ndiri zvakare...Ndava kuchamhebe kwakadziva kumadokero. Zvakanaka, ko kana mumwe munhu akandinongedzera zasi *uko*, zvino ndobva ndaenda nenzira iyoyo? Ndinopfura kwandinofanira kunanga

zvekare; ndaenda kumawodzanyemba kwakadziva kumadokero. Zvakanaka, chero bedzi paine muvhunzo, kuti kumadokero ndekupi, panofanira kuva nemhinduro yakananga pane imwe nzvimbo.

Uye mibvunzo iyi painotarisana nesu, pamusoro peZvokwadi dzeBhaibheri, panofanira kuva nemhinduro yechokwadi pane imwe nzvimbo. Ndizvozvo chaizvo. Inofanira kuvepo.

⁶³ Zvino kana tichinge taona Chimwe chinhu chichiratidza, ndinofunga, panzvimbo yekungotiza, toti, “Ah, hazvina maturo! Handingambotendi chinhu Chakadaro. Handingambotendi Izvozvo,” ko wadii kutora Bhaibheri, wogara pasi wotarisana naRo? WoRinzvera. Uri pano mumusangano zvino, ingoRitarisa rose. Riongorore, pachako, pamwe neShoko. Ongorora Shoko, neShoko. Ndiyo nzira yoga yekuRiita kuti ritaure Chokwadi. Uye Rinofanira kutaura Chokwadi, kubva kuna Genesi kusvika kuna Zvakazarurwa.

⁶⁴ Kristu ndiye chizaruro cheBhaibheri rose. MaAri, Kristu, huzaro hwose. Kuzadziswa kwezviporofita zvose zvemuBhaibheri kunowanikwa muna Kristu Jesu pasina zviga, nokuti Aiva Mwari achiratidza munyama.

⁶⁵ Zvino apo patinowana zvinhu izvi, kunyangwe, kana tichinge tatarisana nazvo zvino touya mumusangano, uye toona simba raMwari richifamba uye richiita zvinhu, uye richiita mabasa emweya, uye toona richiratidza, uye totarissa muBhaibheri zvino toona kuti zvakavimbiswa panguva ino; zvadaro kana tichinge taona zvinhu izvozvo, ipapo tinenge tatarisana nemungava zvichida wekurigamuchira, ndinoreva, seredu.

⁶⁶ Zvino, vanhu vakawanda vanoita zvekuvirirana, vanhu vakawanda vanoti ndizvo. Asi izvozvo hazvi—izvozvo hazvizviite kuti zvinge... Handicho chinhu chaune mungava kwachiri. Sezvandataura, ko kana kune...

⁶⁷ Dai ndaive ndiri jaya, uye ndichitsvaga mudzimai, wekuti ndiroore; zvino hepano pomira musikana ane zvose zvinotarisirwa zvandaifunga kuti ndizvo zvazvinotora kuita mudzimai. Zvokuti, pamazvibatiro aiva mambokadzi, uye akanaka kwazvo, ne-nehunhu hwakanaka, Mukristu wemazvirokwazvo, zvinhu zvose zvandaigona kufunga pamusoro pazvo, zvingandiitire kuve mudzimai akanaka. Zvisinei kuti ndinoti akakwana zvakadii, ndiye wacho chaiye, haasi wangu kusvikira ndamugamuchira pamwe nemungava wekuti iye ave mudzimai wangu.

⁶⁸ Ndizvo zvime chete zviriwo Mharidzo. Unogona kuti, “Yakanaka, kana *ichi, icho*, kana *chimewo*” Uye woti, “Ndinowirirana naYo. NdinoItenda kuti iChokwadi.” Asi

unofanira kuIgamuchira; uye Inofanira kuve chikamu chako, uye iwe wova chikamu chaYo. Unofanira... Zvadaro, Ndeyako.

⁶⁹ Kana ukaroora mudzimai uyu waunenge wakasarudza, mava—mava mumwe zvino.

Uye ndiyo nzira yezvauri naKristu. PaunoMuona achiratidzwa uye achiitwa wemazvirokzwazvo, ipapo wava chikamu chaKe, uye iYe ava chikamu chako. Zvino, pamwe chete, mava chikamu cheMharidzo.

⁷⁰ O, zvikepe zvingani zvemasangano zvatinazvo zviri kuenda zasi kuTashishi, zvavanaJona vemazuva ano, mazana mapfumbamwe azvo, neanoraudzira, ezvikepe zvinotora nzira iri nyore. Zvisingade kutarisana nazvo.

Jona akanga asingade zvokutarisana, nenyaya yekuenda kuMahedheni. Akanga asingade kuendesa Mharidzo iyoyo ine utsinye ikoko, “Mukati memazuva makumi mana, muchaparara kana mukasatendeuka.” Aivenga kuzviita izvozvo. Zvino akafunga, “Iwo Mahedheni, zvakaoma kutaura izvo zavanozondiita.” Asi akatozotarisana nazvo. Maona? Asi akatora chikepe chirri nyore akadzika zasi kuTashishi, ndokudzika pasi muchikepe zvino ndokunorara; akatora nzira iri nyore.

⁷¹ Inzira iri nyore, inzira inofarirwa nevanhu. Zviri nyore kutora nzira iyo yokuti munhu wese anogona kukubhabhadzira kumusana uye voti uri muchinda akanaka, “Uye uyu ndinhingi-nhingi nezvakati,” uye nyika ichange yakatarisa pauri. Zviri nyore kuenda nenzira inofarirwa.

Asi kana—kana uchifanira kuita chimwe chinhu chakasiyana, paunofanira kumira nemaonero ako pane zvaunoziva kuti iChokwadi, ipapo ndipo pane chikamu chakaoma, ndipo panouya kukwizana, ipapo chaipo.

⁷² O, sekugaroimba kwataiita rwiyo rwuya rwekare:

Zviri nyore sei kufamba nechikepe munyanza,
 uye kune runyararo,
Kuvimba nesimba reruoko rwukuru
 rwajehovha.

Asi, oo, regai masaisai atange kurova, regai—regai mhepo ivhuvhute ichisimudza masaisai, zvadaro unoita sei?

⁷³ Zvakaita kunge chimwe chinhu chandakaudzwa, imwe nguva, chakataurwa nemumwe mudzimai. Kare mumazuva emabhiza nengoro, akati bhiza rakatiza richienda naye, achibva kuchechi. Ndokuti, “Wakazoita sei?”

⁷⁴ Akati, “Ndakavimba naShe kusvikira tambo dzadambuka.” Manje, ndiyo nguva yekuvimba naShe, shure kwekunge zvose... shure kwekunge tambo dzadimbuka. Uri kuvimba netambo kusvikira dzadimbuka. Hongu.

⁷⁵ Uye saka tinoona kuti tine nzira dzakawanda dziri nyore dzokuenda nadzo, zvikepe zviri kuenda zasi kuTashishi, nokuti zviri nyore, kusava nemingava yebasa rokuita. Zvinongoyerera zvichipinda, une zvinhu zvose zvichiuya kwauri; munhu wese anokufarira. Uye, munhu wese, uri... Hapana anopikisana newe; iwe hauna waunopikisana naye. Zvino, ndokunge kana iroro risiri jira rekupukutisa ndiro! Ndizvozvo chaizvo. Hongu, unongosairirwa uko, nekungopidigurwa! Handiti, chero munhu, handina basa kuti ndiwe ani, uye kuti wakamirirei... Chaizvoizvo, vanhu vanofunga zvakadzikama vachafunga zvakawanda pamusoro pako kana ukamira nemaonero ako pane izvo zvinenge zvakanaka. Zvakanaka. Hauna hanyn'a...

⁷⁶ Ukatora mudzimai, anokwanisa zvachose kusava nerunako rwakanyanya, uye chero zvaari; asi rega mudzimai iyeye amire nehunhu wehudzimai, morega achimira semudzimai kwaye; zvino kana murume aine huremu hushoma zvahwo wehurume paari, anomumiririra. Zvirokwazvo. Tinoyemura chimwe chinhu icho—icho mumwe munhu anacho, icho chavanotenda kuti ichokwadi uye vachizomira nezvavanofunga kuti ndizvo zvakanaka.

⁷⁷ Kuregedzeka kwakadini, ndizvo zviri Makristu akawanda nhasi, vangori zinyekenyeka nezvimwe zvakadaro, kusvikira vanofunga kuti zvose zvavanongoita kujoinha chechi, vopinda mune imwe nzvimbo, voisa zita ravo mubhuku, kana kuti voita chimwe chinhu chidiki, vosvetuka—svetuka, vodanidzira, kana—kana chimwe chinhu chakadaro, zvino vozvidana kuti Chikristu.

ChiKristu hupenu hwemazuva ose, hwakakwasharara, uchiraramira Mwari mune...nyika ino yanhasi. Kubvira kunoramba kuripo kweMoto pamwe nerudo rwaMwari, mumoyo, zvinokutungidza kuti upfute nemoto uye zvokuisa kunze uko pamwe chete nevanhu, uye uchitendeutsa vanhu kuna Kristu. Mingava yebasa.

⁷⁸ Asi zviri nyore kuenda nenzira inoendwa nayo nenyika. Zviri nyore kuyerera uchidzika nerukova.

Enda kunze uko zvino wogara zasi murwizi, neigwa rako. Iwe wotoru zvimiti zvekutyaira nazvo igwa zvino wotanga kurifambisa uchikwira nerwizi uchipesana nekuyerera kwemvura; hauite nguva yakareba, uye zvinenge zvakaoma. Asi kana ukangoregedza zvimiti zvekutyaira nazvo kamwe chete zvino tarisa uone kuti unenge uchimhanya zvakadini uchidarika miti, uchidzika zasi, asi tarisaka kwauri kuenda!

Kana zvinhu zvichiyerera zviri nyore, rangarira, uri kuenda wakananga kune ma—mapopoma makuru zasi uko, eimwe mhando. Uri kuenda wakanga kumapopoma, uye hakuzombove nenguva refu unenge wava kutowira mumapopoma iwayo. Kungofambiranu pamwe nenyika, zviri nyore, nzira yekwazvinoenda nako, iwe haudi izvozvo. Kwete,

changamire. Asi unofanira mung-...kugamuchira mungava wako.

⁷⁹ Zvino, iwe unoChitenda, uye une...Unofunga kuti iChi iChokwadi.

⁸⁰ Uye mungava watakapihw naMwari muzuva ranhasi, wekuunza Mharidzo ino! Uye ini ndichiwedzera kukura, zvino ndinoziva kuti mazuva angu ava kushomeka, ndiri kunzwa mungava wakakura kupfuura wandati ndambonzwa. Tichienderera mberi, tinofanira kuzviita! Tinofanira kudzika kwauri, pane kwese kwatinoenda, uye totaura Mharidzo; uye—uye toudza vanhu kuti Jesu Kristu ari kuuya, kuti iYe ndiMwari uye Ari kuuya munguva pfupi. Hapana ta—hapana tariro yasara munyika asi Kuuya kwaShe.

⁸¹ Ndiatarisa kumashure uko kune shamwari dzaiva nen kumusoro uko apo Mutumwa waShe... Vakomana ava vakagara pano, ndinotenda vakawana nzvimbo yacho apo pazvakaitikira kumusoro uko. Uye ingorangarirai izvo zvakataurwa naShe zuva racho, kune Hama Wood. Takanga tichifamba tichikwira chikomo. Uye—uye vaiita sokuchema, nokuda kwemudzimai wavo airwara. Zvino Ishe ndokuti, “Nhonga dombo iro uye worikanda mudenga, zvino woti, “ZVANZI NAJEHOVHA.”” Zvino ndakaita izvozvo. Uye Hama Wood vakagara sechapupu.

⁸² Zvino ndakati, “Hama Wood, hapazovi nenguva yakareba kusvikira pamuchaona chimwe chinhu chichiitika.” Uye zuva rakatevera, pataive takamira ipapo, isu tose pamwe chete... Uye boka revarume vachochi rakamira ipo pano manheru ano.

⁸³ Mumwe muparidzi wechidiki aivako, uye aiva ari... Ndakacherechedza... Ndakange ndangosangana naye manheru akanga apfuura. Akange ari mumusasa wedu. Akauya kuzova nesu. Zvino akati kwandiri, akati, “Hama Branham, munomboona here zviratidzo, kunze kwakadai?”

⁸⁴ Ndiati, “Hongu, changamire. Asi ndinouya kuno kuti ndibve pazviri, kuti ndiite sekuzorora zvishoma.” Iye akati... “Zvakanaka,” ndikati, “ndi—ndi... Ndizvozvo, Vanondiratidza zvinhu kunze kuno.” Uye ndikati, “Mhiri kwechikomo kuno uku, ndiko kwakauya Ngirozi nomwe zasi ikoko.”

Iye akati, “Hongu, ndinonzwisisa.” Akati, “Ndaiva ndiri mumwe wevakatsigira nemari musangano wenyu uko muCalifornia.”

Ndiati, “Zvakanaka, ndinofara chaizvo kuzviziva izvozvo.”

⁸⁵ Uye takamira ipapo, pakarepo ndakatarisa kwakapoteredza zvino ndikaona chiremba akaita semufemu achitarisa mumaziso ake, uye ndokumunzwa achiti, “Ucharasikirwa neziso iroro, nokuti mune hurwere mariri. Uye ndarirapa kwemakore maviri, zvino uri kuzorasikirwa neziso iroro.”

Ndikati, "Chikonzero wandivhunza izvozvo, ndechekuti chiremba wako akakutaurira rimwe zuva kuti wanga uri kuzorasikirwa neziso iroro."

Iye akati, "Ndizvozvo chaizvo," zvino ndokutarisa-tarisa *kudai*.

⁸⁶ Uye ndakaona amai vake vachibvisa rimwe ramasitokononzi avo uye ndokubuditsa tsoka yavo kunze, iine twumapundu twakarembera pasi pakati pezvigunwe zvavo, twuchikwira nokudzika negumbo ravo; uye ndokuti, "Kana ukaona Hama Branham, vataurire vanamatire izvi."

Ini ndikati, "Amai vako ruwoko rwavo...vakaburitsa gumbo ravo kunze *seizvi*, uye vakati vaiva vane...vane twumapundu twakati tsvete pazvigunwe zvavo—zvavo, uye nezvakadaro; zvino ndokuti, 'Ita kuti Hama Branham vanamate.'"

Akati, "Hama Branham, ichocco ichokwadi."

⁸⁷ Ndakatarisa kumashure. Pandakadaro, ndakamuona akamira ipapo akatarisa kwandiri, *saizvozvo*, maziso ake achinyatsopenya. Ndakasangana naye nguva ino yematsutso; aiva nemaziso ari nani kupfuura munhu wese aive mumusasa. Ishe vaine vamupodza uye nokumunatsa.

⁸⁸ Ndichiri ndakamira ipapo, Ishe vakati, vakandiratidza zvakanga zviri kuzoitika. "Kutongwa kuri kugadzirira kurova kuMahombekombe ekuMavirira." Uye Akati, "Enda apo, padivi rechoto icho."

⁸⁹ Zvino ndaiva ndine foshoro muruoko rwangu; ndikafamba ndichienda ikoko. Zvino Hama Roy Roberson, isu tose tinovaziva pano. Havasi pano manheru ano, sekuziva kwandiri kuita; vari kuArizona kunze uko. Ivo ndivo sachigaro wevabati vehomwe pano, uye ndakavaziva vari gamba remuhondo. Uye chimwe chinhu chakanga chiri kuzoitika; mangwanani akaivonaka, ane runyararo, dzingaita ten o'clock mangwanani. Vakomana pose ipapo, tiri gumi kana kuti gumi nevaviri, tichidzikisa matende, pamwe nekuvhiya nguruve, nezvakadaro. Saka isu... Ndakafamba ndichipoterera, ndikati, "Roy, hwanda, nekukurumidza. Chimwe chinhu chiri kuda kuitika." Handina kukwanisa kumuudza zvimwe zvekare. Asi panguva iyo yandakangosvika ipapo...

Zvino ndokuburuka kubva kumatenga kukauya chamupupuri chaMwari, uye chikarova, sekudaro, chikazunguza zvikomo, chichimhanyira mukati megomo iroro, chikachecha muhwezva wakaritenderedza, angaita mafiti mashanu kubva pamusoro wemusoro wangu, zvino ndokudimura misoro yose yemiti ichibva, apo matombo aibuda achienda. Chakaenda mudenga ndokudzoka pasi zvekare, nerwumwe rubhabhatidzo rwakakura, uye chikarova nepakati pegomo, uye chikakandira

matombo kunze saizvozvo. Chakazviita katatu, zvino ipapo ndokubva chawkira mudenga.

Zvino Hama Banks vakauya kwandiri, ndokuti, “Ndizvo zvamakataura nezuro here?”

Ndikati, “Hongu, changamire, ndizvozvo chaizvo.” Maona?

⁹⁰ Zvino mazuva maviri shure kwaizvozvo, Alaska yakapotsa, yakanyura, kumusoro uko. Zvino kukwira nekudzika neMahombekombe iwayo ekuMavirira kwaingove nemitinhiro nekusairira, nezvimwe zvose zvichiinika. Uye rimwe remazuva ano ichatsvedza ichienda pasi penyanza. Ndizvozvo. Chii ichocco? Tiri kurarama munguva yeKuuya kwaShe.

⁹¹ Tiri kuona zvitendwa nezvinhu zvichisimuka, uye nezvinhu zvose izvi zvakasiyana, tinoziva kuti panofanira kuva nemhinduro yechokwadi kune izvi.

Pane vanhu vari kunze kuno munyika zvino, vari kuenda mumapako nezvakadaro, “Uye nemusi wa¹⁶ Kurume,” makazviverenga mubepa, “Ishe vari kuuya.” Munoziva kuti handizvo.

Jesu akati, “Hapanu munhu anoziva miniti kana awa.”

⁹² Patinoona zvinhu zvose izvi, uye nezvinhu zvichiinika nemaitikiro azviri kuita, zvino panofanira kuva nemhinduro yechokwadi pane imwe nzvimbo. Panofanira kuva neChokwadi. Pane kumabvazuva, kumwe chete; nekumadokero, kumwe chete; asi pane kumwe chete, kumaodzanyemba kwakadziva kumabvazuva, uye nekuchamhembe kwakadziva kumadokero, kana chimwe chinhu. Asi panofanira kuva nemhinduro yechokwadi, pane imwe nzvimbo, kudambudziko. [Chibenga chisina chinhu patepi—Mupepeti]

⁹³ Kunzvenga izvi? Tinofanira kuudza vanhu kuti tiri kurarama munguva dzeKuuya kweMwanakomana waMwari. Tinoda—tinoda kutarira uye (Mwari) tova pakufamba, nguva dzose, takagadzirira kupa munhu mhinduro yacho chaiyo.

⁹⁴ Zvakagara zvakadaro. Zvaka—zvakagara zviri mumunhu, akanzvenga uye akaenda achibva pana Mwari, kubvira kare Adhama, ari mubindu reEdheni. Apo Adhama aiva mubindu reEdheni, paakasvika pamungava wekuita sarudzo yake, yokuti aizogara naMwari here kana kuti woenda nemudzimai wake? aifanira kutora mung-...aifanira kuiita, mu—mungava wacho waiva kwaari. Iye neimwe nzira aifanira kutora zvainge zvataurwa nemudzimai wake kana kuti zvataurwa naMwari. Zvino paakasarudza kuenda nenzira yemudzimai wake, zvino paakaita izvozvo, ipapo akarasikirwa nechinhano chake chepakutanga. Ndokuunza nyika yose pasi perufu, apo paakazotora mungava wacho, kana kuti zvoreva kugamuchira chiedza chitsva icho chakanga chawanikwa nemudzimai wake, icho chaive chinopesana.

Oo Mwari! Pafungei. Mwari Akangovapa bedzi Mashoko anenge masere kana gumi ekuchengeta. "Asi kana uri muti uyo iwe haufanire kuudya." Ndizvo zvoga zvavaifanira kuchengeta. Uye kunyangwe neShoko rakangowandawo kudaro, vakaRityora.

Zvadaro Adhama aifanira kutarisana nezvokuti, "Ndingadaro, ndingaita here sekutura kwaita mudzimai wangu kuti ndiite, kana kuti ndoita here izvo zvanzi naMwari ndiite?" Uye akabva ipapo meso ake akatovhurika. Aifanira kutora mungava wacho. Izvozvo zvakakandira rudzi rwose rwevanhu kurufu.

⁹⁵ Zvadaro kwakauya mumwe Adhama uya, aiva Kristu, hakuna kumbova neakafanana naYe! Mumwe munhu angati Akanga asiri Mwari? Kusiyana kwaaiiva nako oga kwakaratidza kuti Aiva Mwari. Hapana kumbova nechisikwa chakamborarama chakafanana naYe. Airarama munyika yake Ega. Akaberekwa kunze kwezviyero zvemunhu wepanyama, azere nezvivi. Hareruya! Aiva Musiki pachaKe aitwa nyama.

Ndiani aikwanisa kumira paAkamira? Ndiani akambotaura saYe? Ndiani aimbogona kutaura zvinhu zvaAkataura? Ndiani aimbogona kuita zvinhu zvaAkaita? Kusiyana kwaKe kwaaiive ari kwairatidza kuti iYe aiva Mwari. Paiva pasina muporofita kana chimwewo hacho aigona kuita zvaAkaita; Uyo aikwanisa kudana wakafa kubva muguva, uye Uyo aikwanisa kumisa matenga, uye nokuita chose chaAida kuita. Aiva Mwari. Ndiani aizombokwanisa kumira panzvimbbo yaKe? Ndiani? Chii chaAigona kuva kunze kwaMwari akakwana, asingafi, akaitwa nyama uye akagara pakati pedu!

⁹⁶ Hapana chakamboenzanisa naYe. Airarama munyika yake Ega. Hapana munhu akambotaura saYe. PaAingovhura muromo waKe, paiva nechimwe chinhu pamusoro pazvo, chaiva chakasiyana nemumwe munhu upi zvake. Mumwe munhu akati Aiva munhuwo zvake; ndinozviramba izvozvo. Aiva Mwari. Ndizvo zvaAiva. Nokuti, hapana munhu akambotaura saYe, hapana munhu aikwanisa kutaura saYe, nokuti Aiva Shoko rinorarama pachaRo raitwa nyama, kuratidzwa kwehuzaro hwaMwari.

⁹⁷ Ndinokwanisa kubvuma, vaporofita vaya vaiva nemharidzo yavo. Vaiva nadzo kareko; vanadzo iye zvino. Asi heuno aiva huzaro wehuMwari mumutumbi, hwakaratidzwa ipapo. Iye aiva Mumwe akasiyana, uye Aiva ari iYe aifanira kutarisana nenyyaya yacho. Nemasimba aKe ose makuru aAiva nawo, okuti Aikwanisa zvachose kunge akaita mambo wepasi rose. Achave saizvozvo; uye iYe, kuvatsvene vaKe, ndizvo zvaAri iye zvino.

⁹⁸ Akamira ipapo. Munhui aigona kuva murombo, asina nzvimbo yokuisa musoro waKe; aitoziva kunyangwe apo hove payaive yamedza kobiri? Ndiyani, munhui aigona kutora

majagi makuru aye emvura uye oashandura kuita waini, uye woshaiwa nzvimbo yokuisa musoro waKe? Aifanira kutarisana nemingava yakanga yapihwa muruoko rwaKe. Aiva munhu akadini aikwanisa kumutsa munhu kubva muguva, shure kwekunge ange akafa kwemazuva mana uye awora?

HaAikwanisa kunge akazviponesa paChake here? Chokwadi, Aikwanisa; asi dai Akadaro, Ainge asina kunge akatiponesa. Aifanira kutarisana nemingava yacho, uye nekuda kwekuteerera kwaKe kuShoko! Apo, kusateerera kwaAdhama, uye akanga atora nzira yekudimbudzira, nzi—nzira inoenda zasi kuTashishi. Asi Jesu akatora nzira inoenda kuNinevhe, kuvaHedheni, kuti Anozviwanira Mwenga. Ndinofara nekuti Azviita, manheru ano. Tinofanira kutarisana nezvokwadi, yekuti tiri vaKe, bvisai nyika kure. Amen!

⁹⁹ Munhu wega-wega aifanirwa kutarisana nazvo, ane mungava pamberi paMwari. Tongotora, semuenzaniso, Noa. Aiva nawo. Noa, Mosesi, Eria, nevamwe vose vemu—vemuzera rimwe nerimwe, vaifanira kutarisana nemungava webasa. Uye vaifanirwa kuzviita, asi ndicho chikonzero vakatumwa munguva iyoyo.

¹⁰⁰ Tarisai Noa muzera rake resainzi, kuti aifanira kutarisana sei nechinhu chakanga chichinyatsopesana nesainzi. Handiti, pakanga pasina chi—chi—chikonzero chokuti sei chaizotadza kuplesana nesainzi...Munoona, cha—chakanga chichinyatsopesana nesainzi, waro. Handiti, vakati kuri kuzonaya kubva kumatenga. Vakanga vasina kumbobvira vawana mvura inonaya yakadonha kubva kumatenga. Zvino, aifanira kutarisana nenyaya yacho. Mwari vakati kuri kuzonaya. Uye zvadaro iye...

¹⁰¹ Saka kutenda kusina mabasa kwakafa; kana iwe ukati, “Ndinozvitenda,” uye worega kuita chinhu. Sezvakangoita Mharidzo, kana iwe ukati, “Ndinoitenda,” worega kuita chinhu, chii chakanaka chazvinoita? Maona? Noa akapinda pabasa nenyundo yake akavaka areka, kuti asimbise zvaakanga achitaura nezvazvo. Ndizvo zvatinofanira kuitawo, zvekare. Tinofanira kupinda pabasa, kuti tiratidze kutenda kwedu, nemabasa edu. Mabasa edu anoratidza kutenda kwedu.

¹⁰² Mosesi akatozviita, naEria akatozviita. Muporofita wose muzera rake akatomira ndokutarisana nemingava iyi. Asi vazhinji vavo havana kuita saJona. Iye akatiza; ivo havana.

¹⁰³ Cherechedzai, “Danidzira uchipikisana naro.” Oo, ini zvangu! Hezvinoika izvo. Ndicho chidzidzo chacho, “Danidzira uchipikisana naro.” Hecho chikamu chekucherechedza.

Ingoenda ikoko unoudza machinda iwayo, “Uti, ndauya zasi kuno kuzobatana nemi machinda. Munoziva, ndinotenda ndichakutaurirai zvandichaita. Ndinongove nekanhu kadiki

pano ndinotenda ndinogona kukaita kuti kave... kanotiunza tose pamwe chete, uye toita *ichi, icho*, kana *chimwewo*.”

Asi, yaiva, “Danidzira uchipikisana naro,” apo paunofanira kudanidzira uchipikisana nechimwe chinhu. Zvino, aifanira kudanidzira achipikisana nezvose zvaiva zasi ikoko; danidzira uchipikisana neguta, danidzira uchipikisana nebasis ravo, danidzira uchipikisana nechechi yavo, danidzira uchipikisana nevaporofita vavo, danidzira uchipikisana nevashumiri vavo, danidzira uchipikisana nevaprisita vavo. “Danidzira uchipikisana naro, chinhu chacho chose! Danidzira uchipikisana naro!”

¹⁰⁴ Noa akadanidzira achipikisana nezera rake. Chokwadi, akadaro, achipikisana nemachechi ezera rake.

Mosesi zvechokwadi chaizvo akadanidzira achipikisana nezera rake—rake; vanhu vacho, vaprisita, nezvime zvakadaro. Akadanidzira nzira yose nemurenje. Mhararano dzose, akadanidzira, akadanidzira nguva dzose kuvanhu.

Eria aiva asingafarirwe kwazvo muzuva rake, nokuti akadanidzira achipikisana nezera iroro. Zvechokwadi ndizvo zvaava.

¹⁰⁵ Johane muBhabhatidzi aiva asingafarirwe kwazvo muzera rake. Akadanidzira achipikisana nezera rake. Akati kuna mambo, mu—mutongi ane simba we—wenyika; a—akanga, akaroora mudzimai wemukoma wake. Aifanirwa kuparidza pamusoro pekuroorana nekurambana, mamwe mangwanani. Saka akadanidzira achipikisana nazvo, akati, “Hazvina kukodzera pamutemo kuti iwe uve naye.” Zvakamutorera, kuti musoro wake udimirwe, pamberi pacho, asi akadanidzira uye akamira panzvimbo yake yebasa.

Haana kutora chikepe chaienda kuTashishi, uye ndokuti, “Zvakanaka, ndichawirirana newe, Herodhe. Zvose zvakanaka. Chero bedzi uchingofunga kuti iye mudzimai akanaka, ari kukuitira mudzimai akanaka, enderera mberi.” Oo, nhai veduwhee. Aya machira endiro, muri kuona, hongu, chero chinhu chidiki chose... Handiti, hapana zvariri kunze kwekusukisa ndiro dzakasviba.

¹⁰⁶ Asi, cherechedzai, Johane akanga asina kudaro. Akanyatsotarisana nazvo. Iye akati, “Hazvina kukodzera pamutemo kuti iwe uve naye.” Hongu, changamire. Uye akamira achipesana nazvo.

¹⁰⁷ Havana kumbotiza. Johane haana kudaro. Vakamira vakatarisana nechaizvo zvaivepo. Mosesi akaedza kutiza, imwe nguva, saJona, asi Mwari vakamudzosa. Vazhinji vavo vakaedza kubva pazviri; vaigona kutanga...

Asi, tarisai, kana Mwari akakudana, uye uine chokwadi chekuti Mwari vari muMharidzo, hapana chinhu

chichazokudzosera kumashure. Hachina kudzosa Jona. Kwete, changamire.

¹⁰⁸ Amosi wekare, akadanidzira, akati, “Shumba yadzvova, ndianiko angarega kutya? Uye Mwari vataura, ndiani angarega kuporofita?” Ndiani angarega kuporofita, paunoona Mwari vachitaura voti chimwe chinhu chichaitika, uye hechinoi icho?

¹⁰⁹ Shumba ikadzvova, munhu wese anotya, hongu, changamire, kana wakambonzwa imwe ichidzvova musango. Unogona kunzwa idzi dzichichema kunge katsi mese mumakeji aya kunze kuno, idzodzi shumba dzakajaira vanhu, asi unofanira kunzwa chaiyo imwe yemazvirokzwazvo, yemusango ichidzvova imwe nguva. Matombo madiki anodonha kubva muchikomo, chiri kure mayadhi mazana mashanu. Ndinoda kuona cuti kudzvova kwose ikoko kunobva papi mumapapu iwayo. Zvino inokandira musoro wayo pasi, yokandira zenze riya mudenga; handisati ndakambonzwa chimwe chinhu... Senga—nganunu painotinhira, painoburitsa zvine simba kudzvova kuya kukuru kuchibva mumapapu ayo. Ndiani angarega kutya?

Vanoti, kana ukauraiwa neshumba, hazvirwadze. Inokutyisidzira zvokuti unongofa isatai yasvi ka pauri. Munona, haumbozvicherechedza. Inokutyisidzira nekudzvova kuya kukuru kune ukasha, uye hepano inenge yava pauri mukanguva kadukusa kwazvo.

¹¹⁰ Iye akati, “Shumba yadzvova, ndianiko angarega kutya? Uye Mwari vataura, ndiani angarega kuporofita?” Paunoona Mwari vachiita chimwe chinhu, iwe woti... “Ndinogona kunge ndisiri muporofita...” Jona akati... “Ndinogona kunge ndisiri muporofita, kana mwanakomana wemuporofita. Asi Mwari vataura, ndiani angarega kuporofita?”

¹¹¹ Ndinogona kunge ndisiri muporofita, ndinogona kunge ndisiri *izvi*, *izvo*, kana *zvimwewo*. Pandinoona Mwari vachiita chimwe chinhu, uye ndochiona muno muShoko, uye iYe akachivimbisa, ndianiko anganyarare uye agoramba akazvibata? Chokwadi, Akazviita.

¹¹² Saizvozvo hatigone kuhwanda seri kwezvitendwa nekumwe kwese kuyanana uku kuri pano, uye zasi ku—kuTashishi. Hatidi kufambidzana nezvekuyanana izvi.

¹¹³ Asi vazhinji, saAdhama, vanoita chinhu chimwe chete, vanoedza kugadzira chimwe chinhu chinotsiva neimwe nzira, vanoedza kutsvaga imwe nzira yekubuda nayo, uye—uye vogadzira chimwe chinotsiva, cuti vatarisane naMwari. Shure kwekunge ivo vaziva chakaipa, vatarisana neChokwadi, akaenda nemudzimai wake akanoita chaizvo izvo Mwari akanga amutaurira cuti asaite. Akaenderera mberi akanozviita, zvakadaro. Uye zvadaro akazozviona asina kupfeka, mudzimai nemurume, vari vaviri, mubindu reEdheni. Meso avo akazaruka.

Vakaziva chakanga chakanaka nechakaipa, ipapo. Uye zvadaro akaedza kuwana chinotsiva, kuti aite sekuzvifukidza nacho.

Zvino, zvakangoda kufanana nenzira yatinozviitawo nayo nhasi, pembedzo, woti, "Zvakanaka, ndinokuudzai, dai change chiri *apa*, kana kuti dai *ichi*." Kana kuti, "dai, dai, dai," zvinongova... Maona? Asi unofanira kutarisana nacho. Chinofanira kuva chakanaka kana kuti chakatsveyama. Uye kana chakanaka, ngatigarei nacho. Kana chakatsveyama, ibvai pachiri. Ndizvo zvoga. Wana icho... Tsvaga icho chacho chakanaka. Haungadi kuramba wakamirira. Ngatiwanei iye zvino kuti Chokwadi ndechipi uye nekuti chakanaka ndechipi, uye togara nacho. Tinoziva kuti ichokwadi.

¹¹⁴ Zvino, tinoona nhasi kuti vanhu vedu vakanyatso... Zvinoratidzika sekunge kuperera kwese kwakabuda kubva mumachechi. Ini... Mukati...

¹¹⁵ Tiri kugara muimba uko yehanzvadzi inokosha inouya pachechi pano. Ivo zvichida vakagara muno manheru ano. Uye vanoirendesa kune vavo... vanhu vacho. Zvino vanga vakangonaka kwatiri zvakanyanya maererano nenzvimbo iyoyo, nekuda kwekititendera kuti tiwane nzvimbo iyoyo. Zvino saka ndaigona kudana zita ravo, asi ivo zvichida havangadi kuti ndizviite. Uye ivo vanga vakanaka kwazvo kwatiri, saka, zvirokwazvo hati—hatingadi kuvalsa pachena. Asi vanga vari mudzimai akanyanya, kwazvo kukosha. Zvino mumba imomo, manga mune terevhizheni neche kune rimwe divi. Isu tine kamba, kaduku, kemhuri mbiri.

Ndine mhuri yakakura, neboka revadiki, uye isu... uye munoziva, zvino vanofanira kuva nemibhedha, uye yakawanda. Uye zvinhu zvese zvakaturikidzana pamusoro, uye unofanira kufamba uchidarika nemune *ichi* uye nemune *icho*, kuti upinde nekubuda.

¹¹⁶ Uye zvadaro ikoko vaiva neterevhizheni. Zvino muterevhizheni iyi, vadiki vakanga vachiona, musi weSvondo mangwanani, imwe mhando yekuimba nziyo dzechitendero dzakabuda ipapo. Uye, munoziva, zva—zvaitopotsa zvakuita kuti unyare; dai panga pasina Chikristu chechokwadi pane imwe nzvimbo chawaigona kuisa maoko ako pachiri, kuti uone kuti chii chinonzi Chikristu. Nhai, zvinoita sokunge kuperera kwose kwakabuda mazviri. Nhai, havadaro, havaratidze sokunge... Handiti, zvakangoshata kwazvo nzira yemamiriro avanoita ipapo zvino vopfumba zvibhakera zvino vorwa mumwe nemuwe, ipapo pacho, zvino voedza kuimba nziyo dzechitendero nezvimwe zvose saizvozvo; uye votaura zvinosetsa izvo zvekuti zvakaoma kuti mutyairi wechikepe angataure, uye votaura zvinhu zvemhando dzose, uye voita jee pamwe nokuunderera. Munoziva, kuyereswa kwe—kwe—kweChikristu kwaratidza sekunge kwashaiwa nzvimbo yako.

¹¹⁷ Zvino, ndakaenda kuchechi uye—uye ndokuona mufudzi achienda kumusoro ikoko ndokupa chiziviso kuti kuchave—kuchave nemu—mutambo wekushambira. Madzimai ose vakapfeka hanzu dzekushambira nadzo, vose vari kuenda kunze ikoko. Vachange vaine mangange; madzimai aya, vachishambira. Uye vachange vaine ma—mabiko eimwe mhando, uye vachange vachikaringa nyama ye—yehuku yakawanda, nekutamba mutambo wemadhaiza, ne—nezvimwe zvinhu zvose izvi zvakadaro. Kwandiri, izvozvo zvinobvisa kuperera kwechokwadi kubva muChikristu; kungoita zvesezvese.

¹¹⁸ Ndakaona, ndichiuya kumusoro kuno, tinoona kuti... Munoziva, tinoona vakawanda vehanzvadzi dzedu vachipfeka zvikabudura, kumusoro kuno munyika ino inotonhora, kupfuura zvaunovawana vakaita kunze uko munyika iyo inopisa. Munoona, ichokwadi. Kunze uko kunopisa zvakanyanya, hakuna vakawanda vavo vanozvipfeka. Asi kuno, kwacho—kwacho kunotonhora, va—vanozviita. Munoona, nokuti, havacherechedze kuti ndidhiyah bore ari kuzviita izvozvo. Maona? Zvino, dai zvaiva zvekuti uve unonzwa kuve wakasununguka, dai zvaiva zvekuti uzvibatsire, zvaizova zvakasiyana. Ari murume, ndinofunga kuti zvinotaridzika zvinorwarisa pamurume, asi—asi iwe—iwe uno—hautombobatikana nekutarisa kune murume. Asi, mudzimai, muvir wake—wake wakayereswa, uye anofanirwa kuuchengeta wakadaro. Uye kuona wekare...

¹¹⁹ Unogona kuona, vanhu nhasi. Pane mwuya miviri. Uye mumwe wayo Mweya Mutsvene; mumwe wacho mwuya wetsvina, uye mumwe anotongwa neiwoyo. Uye vose vari vaviri vari vanamati. Zvino, hongu, ndicho chikamu chinoshamisa, ivo vari vaviri vanamati. Uye sezvakanga zvingori Esau naJakovho, vose vari vanamati; sezvaiva zvakaita Kaini naAbheri, vose vari vanamati; sezvaiva zvakaita Judhasi naJesu, vose zvinamato, vose vari vanamati. Uye tinozviona nhasi, mativi ose maviri, vari vanamati. Munoona, mwuya mumwe chete. Vanhu vanofa, asi mwuya haufe. Unonyatsoenderera mberi, yose iri yezvinamato.

Mumwe wavo akagarwa neMweya Mutsvene, anorarama mhando yehupenyu hwavanofanira kurarama, uye ofamba zvine humwari uye akatendeka. Havangambokutsotse kana kobiri zvaro, uye va—vanoita zvinhu zvose vakatendeka zvavangagona kuita, kuti vakubatsire. Uye vamwe vano...Vakangonaka sezvavanogona kuva.

Zvino vamwe vacho, tinoona kuti, zvinongori zvakapesana zvacho. Uye, zvakadaro, yose iri miviri mwuya yezvinamato, iri miviri; mumwe, Mweya Mutsvene; uye mumwe wacho, mwuya usina kururama. Uye kana makambocherechedza, unodaro, kunyangwe uchizviti ndewe chinamato, vanoita jee newe uye vokuti muumburuki mutsvene. Vanoita zvose zvavanogona.

¹²⁰ Ivo, vachishaya hany'n'a neShoko raMwari ri-risingashanduke, sekunge Risina kumbobvira rakanyorwa.

Munoona, unogona kuti, “Zvino, tarisai pano, kana—kana rubhabhatidzo...”

“Ndine Mweya Mutsvene!”

“Uye wakamira ipapo nemudzanga uya muruoko rwako, uchiuputa?”

“Hongu, ndine Mweya Mutsvene! Handifunge kuti zvakaipa kumbodzvutawo zvishoma. Handifunge kuti izvozvo...” Maona?

Uye macherechedza, “*Ini handifunge?*” Asi Mwari vanofunga zvakasiyana, muri kuona, zviri maringe neShoko raVo. Maona? Munoonaka, ivo... Uye ivo—ivo vanongoita zvakafanana se—sekusvipira paRiri. Ndizvozvo chaizvo.

¹²¹ Sezvakangoita muchinda mudiki uyu akaremara akakambairia panguva iya, apo Dhavhidhi ainge ari kudzingwa kubva pachigaro chake. Akanga achikwira Gomo reMiorivhi, achibuda kunze, achichema paaikwira kumusoro, achitarisa shure. Zvino muchinda mudiki uyu wekare akakambairia kunze uko uye achimusvipira mate. Zvino mutariri uya akati, “Ndicharega mu...musoro wembwa iyi uri paari, achisvipira mambo wangu?”

Dhavhidhi akati, “Musiye akadaro.” Munoonaka, vakamusvipira.

¹²² Makore angaita mazana masere akatevera, vakasvipirawo Mwanakomana wake, Jesu Kristu, zvekare.

Uye nhasi vari kuMusvipira zvekare. Sekunge Rakanga risina kana kumbobvira... Havana ruremekedzo, havana hany'n'a, vanongotendeudza musoro wavo mudenga vofamba vachienda kubva paRiri, uye voseka pamberi pakos. Sei zvakadaro? Vari muchikepe chiri kuenda kuTashishi. Ndizvozvo chaizvo.

Kudana uku kuna Mwari, munofanirwa kudanidzira muchipikisana nechakaipa, kudanidzira muchipikisana nechivi, kudanidzira muchipikisana nezvinhu zvakatsveyama. Zvino, rangarirai, zvichange zvakadaro.

Hei, munoziva, nguva ino. Munoziva, ndakasiyana nemaawa maviri. Uye kuTucson anongori maminitsi gumi nguva dzaseven dzadarika, uye—uye ndava kuita sekunge—sekunge ndabva panzvimbo yangu pano. Huh? Zvakakanaka.

¹²³ Zvino rangarirai, tichatofanirwa kuzozvipindurira. Rangarirai, avo vakasvipira Kristu vachazvipindurira.

Apo Dhavhidhi paakadzoka kubva pakudzingwa kwaakanga aitwa, apo paakanga ari munhu aitiza, zvino apo paakadzoka, rangarira, muchinda uyu akawira pachiso chake

ndokuchemera tsitsi. Akasvipira Dhavhidhi, achibuda kunze, asi akatopotsa agadzirira kushamba tsoka dzake nemisodzi, uye, paakadzoka.

Uye rimwe zuva avo vakabaya Jesu vachazviona.

Uye avo vari kuMubaya nhasi vachazvionawo, zvekare. Ivo, nerimwe zuva, zvichavadzokera. Rangarirai, Zvakazarurwa 22, iYe anoda kuti tichenete Shoko rose raAkanyora; Shoko rose.

¹²⁴ Zvino tinoziva kuti Hupo hwaKe huri pano. Hwakasimbisa. Tinahwo. Tiri kuvimba, muvhiki riri kuuya iri, hucharamba huchisimbisa pakati pedu; varwere vachapodzwa, uye zvinhu zvikuru zvichange zvichiitika.

Hatidi pfungwa inofarirwa neruzhinji. Tinoda Chokwadi. Uye hatidi, isu (kuda) hatidi ku—hatidi kutarisana nechimwe chinhu hacho kunze kwezvakataurwa naMwari kuti iChokwadi. Asi, “Iva nechokwadi chokuti zvivi zvako nguva dzose zvinozongokuwana.” Kana zvikasadaro pano, zvichakuwana paKutongwa. Saka uri—uri... Zvichakubata pane imwe nzvimbo, zvino. Hongu, changamire.

¹²⁵ Asi kana uri muKristu wechokwadi, wakadanwa zvechokwadi saJona, Mwari vanotove nemubhadharo wako wakatobhadharwa kare. Ibva muchikepe icho chiri kuenda kuTashishi, zvakadaro. Mwari vakakutemera kuhupenyo huno. Hongu, changamire. Kana uri mwana waMwari wechokwadi, akadanwa, huya kuna Kristu. Huya muhuzaro hwaKe. Nzira yako yakabhadharwa kusvika kupi? Yakabhadharwa kusvika kuNinevhe, kwete kuTashishi. Wakatemerwa. Chikepe chako... Pane chikepe chava kuenda iye zvino, chiri munzira yacho. Saka panongove nechinhu chimwe chete chekuita, ndeche kukwira machiri. Uye dai wanga wakafanana naMwari, hauzombifa wakava nerugare...

¹²⁶ Semuzukuru wangu mudiki, nguva yapfuura. Makore angaita gumi iye zvino, akafamba achienda kuno nekoko. Mamwe mangwanani akaenda kune imwe chechi iyi, chechi yeKatorike iyi zasi kuno, uye ndokutora imwe iyi nekuda kwezvinotaurwa nevamwe baba vatsvene pamusoro pazvo nechekuno uku, uye nevamwewo neche *pano*, uye nevamwewo neche *apa*. Zvose izvozvo zvinozovika pakuvei? Maona? Zvino achiri kungonzwa nzara nenyota. Ndikati, “Nzvimbo yako iri paaritari zasi uko, mwanakomana.” Maona?

Hapana nzira yekubuda mazviri. Kana Mwari vave kukuronda, chitongokanda hako mapfumo pasi zvino woenderera mberi. Ndizvo zvoga.

¹²⁷ Rangarirai, Mwari! Zvakanaka, Mwari vaiva muchikepe. Mwari vaiva mudutu. Mwari vaiva muhove. Kwese kwaaitendeukira, Mwari vaiveko.

Munoona, Mwari variko, uye zvinozongoramba zvichikushungurudza. Saka tichiri kuramba takamirirei? Regai tichingotanga rumutsiriro urwu zvakanaka. Zvakanaka! Muri kumirireiko? Tinotenda kuti Kuuya kwaShe kwava pedyo, uye kuti Ari kuzova neMwenga, uye Agadzirira. Uye hatidi zvikepe zviri kuenda kune chero zvayo Tashishi. Tiri kuenda kuNinevhe. Huh! Tiri kuenda muKubwinya. Ameni. Ndizvozvo chaizvo. Tiri kuenda uko Mwari vari kuzoropafadza, uye ndizvo zvatinoda kuita.

¹²⁸ Garai muHupo hwaMwari, ipapo, nemoyo yedu; kwete maoko edu, zvakanyanya, asi moyo yedu pamberi paMwari, kusvikira atirunga, zvose muna zvose, saizvozvo, nemirazvo yekubwinya kwaKe; uye ndokubika matiri kunaka kwaKe—kwaKe, nekuibvisa izvo zvatinazvo, kuve mazvirokwazvo, munoona, kusvikira patinogona kuratidza vamwe kuti Jesu Kristu mupenyu. Oo, ini zvangu! Tinoda kuti tizvitende izvozvo.

¹²⁹ Uye rangarirai, kwakaendwa naJona, Mwari vaiva muchikepe; Mwari vaiva mudutu; Mwari vaiva muhove. Vakaenda mberi vari chaipo pamwe chete naJona kusvikira kuda kwaVo kwakakwana kwaitwa. Ndizvozvo chaizvo.

Uye kana Vachingokutevera, unogona kunzvengera neche kuno *uku*, uye wonzvengera neche *uko*, asi uchange wakasuruvara kusvikira wadzoka uye woita chinhu chawakatanga kuMuitira pakutanga. Maona? Usaende, uchitiza kubva muHupo hwaMwari. Tarisana nazvo. Ukatenda kuti iChokwadi, zvadaro rega...Kana chiri Chokwadi, chakakodzera kuchiraramira, kuchifira, chero chimwe chinhu. Uye kana Achinge angochisimbisa kwauri, kuti iChokwadi, zvadaro hatigone kutiza tichibva pachiri, chero kupi hako. Anenge aripo ipapo chaipo, zvime chetezvo. Haugone kuzviita.

¹³⁰ Kubudikidza nemuporofita waKe waakapa, wacho waAkatemera kuti aende zasi ikoko uye ogotaura mharidzo iyoyo. Zvino, zvaitaridzika sokuti Aigona kunge akatuma mumwe muporofita, asi akatemera Jona; uye kunyangwe Eria haaikwanisa kuzviita; Jeremia haaikwanisa kuzviita; Mosesi haaikwanisa kuzviita. NdiJona aifanira kuenda kuNinevhe. Ndizvo zvoga zvaivapo ipapo. Vakamutuma ndokumuudza kuti aende. Zvino kana Achinge ati, “Enda uko, Jona, enda kuNinevhe,” hapana mumwe munhu anokwanisa kuenda onozviita kunze kwaJona.

Zvino kana Mwari vachinge vakuudza chimwe chinhu, unotofanirwa kuchiita; kwete mumwewo munhu. Munoona, tinofanira kutongotarisana nazvo, uye, toenda kunozviita.

¹³¹ Tinotenda kuti tiri kurarama munguva iyo apo Mwari vari kuita chimwe chinhu. Tinotenda kuti tiri kurarama pakati pazvo iye zvino. Ndinotenda manheru ano ndiri kuparidza kuungano iya ya—yakarara, yakamirira kunze uko kuti igoibva.

Ndi—ndinozvitenda zvirokwazvo izvozvo, nemoyo wangu wose. Ndinogona kuti zvime chete iye zvino sezvazvagara zviri.

¹³² Zvino, tinotenda kuti nguva yasvika yekuti Mutsvane Johane 14:12 inofanira kuzadziswa. Isu, tinotenda kuti Maraki 4 inofanira kuzadziswa. Tinotenda kuti Ruka 17:30 inofanira kuzadziswa. Tinotenda kuti, zviporofita zvose izvi zvaAkati zvichazadziswa muzuva rino. Tinotenda kuti zvinofanira kuzadziswa, uye tinotenda kuti tiri kuzviona zvichizadziswa iye zvino. Ndizvozvo chaizvo.

¹³³ Mira kutiza. Usabude kubva muHupo hwaKe; ingofamba uchipinda muHupo hwaKe. Ndizvozvo chaizvo. Uye ndinoziva kuti ndizvo zvauri kushuvira kuita. Nokuti, ndaona nhambapureti dzemota kunze uko dzabva kuTexas, nekuLouisiana, nekumwe kwese. Ndizvo zvatiri pano kuti tiite, hakusi kumhanya tichibva muHupo hwaKe, asi kumhanya tichipinda muHupo hwaKe.

Dzoka, buruka kubva mune...[Chibenga chisina chinhu patepi—Mupepeti]...wanga uri Jona, kana wanga uri kunetseka uchishaiwa kuti woenda nepapi kana kuti woitei, huya, kwira muchikepe pamwe chete nesu manheru ano. Tiri kuenda zasi kuTashishi, kunodanidzira...kana kuti, Ninevhe, kunodanidzira. Tiri kurega chikepe chekuTashishi kuti chiende hacho zasi kana vachida kudaro. Isu tine basa pamberi paMwari, ndiyo, Mharidzo yatine mungava kwairi.

¹³⁴ Saka muvhiki riri kuuya iri, manheru ano inongova nhangaruvanzu duku, kuitira kuti muzive. Pandinenge ndava kudanidzira, ini ndomene ndine mungava kuMharidzo, hama. Imi vashumiri makagara muno, handisi pano kurwadzisa manzwiro enyu. Uye imi madzimai nevarume, panyaya iyi iri kuuya yekuroorana nekurambana, ndinoda kuti murangarire manheru ano. Ndataura zvose izvi, kuti ndiunze izvi kwamuri, kuti ndine mungava kuna Mwari bedzi.

Uye zvadaro, zvekare, ndine mungava kwamuri, kuti ndikutaurirei Chokwadi. Uye handisi kuzokutaurirai chimwe chinhu kunze kweChokwadi, chero bedzi Mwari vachingoita kuti ndizive kuti Chokwadi ndechipi. Kusvikira ndaziva Chokwadi, handizotauri chimwe chinhu pamusoro pacho, munoonia, handizotauri chimwe chinhu pamusoro pacho. Asi ndinotenda kuti Mwari vanondiratidza Chokwadi pamusoro peKuroorana NeKurambana, uye ndinovimba kuti Vachandiita kuti ndichiburitse.

¹³⁵ Uye dzimwe Mharidzo dzandiri kuda kuva nadzo vhiki rino, ndeidzi, *Merikizedheki Uyu Ndiani? Ndepapi Apo Mwari Paakasarudza Kuti Aise Zita RaKe?* Uye nedzimwe shoma dzezvinhu izvo zvakadaro, dzinova Mharidzo dziri kuuya, neMarwadzo Ekupona. Ne—nezvimwewo zvinhu zvishoma, izvo zva—zvakada kudaro, zvichienderana neMunhu Achisarudza

Mudzimai Wake. Uye nezvinhu zvishoma, idzo Mharidzo, dzandiri kuda kuunza vhiki rino. Asi ndiri kungoda kuti ungano...

¹³⁶ Zvokuti, kana pakava nemushumiri pano; handisi pano, hama dzangu... Handidi kuti imi, kana kuti vamwe venyu imi nhengo, modzokera kuchechi kwenyu, zvino moti, "Hama Branham vakati zvakati nezvakati."

Ndine mungava kuMharidzo yakapihwa kwandiri kubva kuna Mwari Samasimba. Sekumira kwandakaita pano manheru ano, uye Mwari vanoziva kuti ichokwadi, kuti zasi kuno chaiko parwizi urwu... Pane vanhu, zvichida, vagere pano, apo Mutumwa waShe akaburuka ipapo ndokundiudza izvo zvaAkaita, ipapo chaipo muna 1933, zasi chaiko pana Spring Street iyi pano. Kana uri muyenzi pano, tyaira wakananga zasi. Pakona paSpring Street, ipapo paunosvika parwizi, zvino ipapo ndipo pazvakaitika. Maiva muna 1933. Zvichida ava makore anenge makumi matatu nemaviri apfuura, zvino. Oo, ava makumi matatu... ava makumi matatu... makore makumi matatu nemaviri apfuura, makore makumi matatu nemaviri apfuura.

Uye kuti Akazviunza sei izvozvo kwazvo, zvose hazvo. Uye takabuda tichienda kunze, tichiunza Mharidzo, uye tikaona varwere vachipodzwa, mapofu, nevakaremara, nemhetamakumbo, nevakaunyana, nezvimwe zvose. Uyewoze tikaona kunyangwe vakafa, avo vatinoziva kuti zvakatosimbiswa, vachimutswa kubva kuvakafa. Vanhu vachifa, uye vachimutswa kudzokera kuhupenyu zvekare, uye nezvimwe zvinhu zvose izvi. Kana Mharidzo ikaenda, panenge paine zviratidzo nezvishamiso!

¹³⁷ Uye muchiri kungoona mafungiro ekare mamwe chete amakangogara muinawo? Iyoyo haina kubva kuna Mwari. Mwari havazongofanirwa kuita...

Mwari vari kuedza kubata meso ako kuti akwezvwe kune Chimwe chinhu.

¹³⁸ Uye zvadaro Jesu paakabuda achienda, Akatanga kupodza vanorwara, achiita mabasa makuru nezvinhu. Iye, nguva dzose, iYe... Jesu akazviita. Uye Mosesi naJesu vakazviita, nevamwe vose. Zvino paAiva pano, Akazviita.

Uye Ari kuzviita, zvime chete nhasi. PaAnotumira musangano saizvozvo, rumutsiriro, nekutanga musangano munyika, zvino otanga kufambira mberi nezviratidzo nezvishamiso zvikuru izvi. Uye zvadaro moona, kuchidzoka, madzidzisiro aya ekare mamwe chete, pane—pane chimwe chinhu chakatsveyama ipapo pane imwe nzvimbo. Pane chimwe chinhu chitsva chiru kuuya! Jesu paakabuda, mushure, apo...

¹³⁹ “Iye ndiRabhi akanaka.” Aikwanisa kuenda kune chero purupiti zvayo uye woparidza, apo paAipodza vanorwara. Apo, oo, vaifarira kuva naYe ikoko.

Asi rimwe zuva paAkagara pasi, uye ndokuti, “Ini naBaba vaNgu tiri Mumwe,” hama, haAna kuzombova nemukurumbira shure kwaizvozvo. Apo paAkati, “Kunze kwekunge wadya nyama yaNgu, nekunwa Ropa raNgu, hauna Hupenyu mauri. Asi uyo anodya nyama yaNgu, nekunwa Ropa raNgu, ane Hupenyu husingaperi; uye Ndichamumutsa pazuva rekupedzisira.” Zvadaro, haAna kuzombofarirwa zvakanyanya kubva ipapo.

¹⁴⁰ Ivo vakati, “Murume uyu ndimusvetaropa. Murume uyu ndiBherizebhabhu. Ndiyo nzira yaAkaita nayo zvinhu izvozvo. Aigona kuuka. Aitarisa kuburikidza nemupfungwa dzavo—dzavo uye oziva zviri mupfungwa dzavo. Iye muuki.”

Asi, zvazvaiva zviri, iYe—iYe aiva Shoko raMwari rakaratidza renguva iyoyo. Uye Aive nemungava. Iye akati, “Ndinoita nguva dzose izvo zvinofadza kuna Baba vaNgu.” Mwari ngavatibatsire kuti tiite zvimwe chetezvo, kuita izvo zvinofadza kuna Baba.

¹⁴¹ Uye ndine tariro yokuti imi mose muchanzwissa. Kana mukapesana nenii paMharidzo idzi nezvimbewo, kuti mucharangarira, kuti chingovaiwo nekuremekedza uku, kuti ndine mungava, uye kuti handisi kuenda kuTashishi. Ndiri munzira kuenda kuNinevhe, uye ndi—ndinofanira kunodanidzira. Ishe vakuropafadzei mose.

Ngatikotamisei misoro yedu zvino kwekanguvana.

¹⁴² Dzava kuda kutosvika nine-thirty. Handidi kukuchengetai, asi ndinoda kuwana izvi kana ndikakwanisa, manheru ano. Pane vamwe here pano avo—avo vasiri chaipo pavanofanira kunge vari muna Kristu, asi u—uchida kunge uri ipapo, uye uchishuvira kuvepo, ungasimudza ruoko rwako here, woti, “Hama Branham, ndinamatireiwo”? Mwari vakuropafadzei, ingotorisai maoko acho. “Ndi—ndinoda... Ndiri pano, Hama Branham, kuti ndiswedere pedyo naMwari.”

Uye kana musoro wako wanga wakasimudzwa, ruoko rwangu—rwangu rwakasimukawo, zvekare. Ndizvo zvandiri pano kuti ndiite. Ndiri kunzwa nzara, sezvauri kuitawo.

¹⁴³ Asi, oo, rimwe zuva, chimwe chezvinhu zvikurusa chakaitika, uye ndi—ndinoziva zvino zvokuita. Uye ndi—ndinonamata kuti Mwari vakupei iko kunzwisia kwakajeka. Kuripo. Mu...Kana paine muvhunzo mupfungwa dzako, panofanira kuva nemhinduro pane imwe nzvimbio, kupindura muvhunzo iwoyo. Munamato wangu, ndewekuti, Mwari vakuitei kuti muone muvhunzo wacho uchipindurwa panguva iyoyi.

¹⁴⁴ Kana uchirwara, dai Mwari vakakupodza. Tichava neshumiro dzekupodzwa, ndinodaira, chaizvoizvo manheru

oga-oga, uye tiri kuzonamatira vanorwara. Tichaita zvose zvatinogona kuti tikubatsirei, uye imiwo moita zvose zvamunogona kuti mutibatsirewo. Uye tichashanda pamwe chete, tichivimba kuti Mwari vachatipa musangano mukuru.

¹⁴⁵ Zvino, Mwari Baba, mashoko aya mashoma maduku akagurwa-gurwa, asi ave mumaoko eNyu zvino. Ishe, ataurwa. Ini ndinofanira kuzosangana nawo. Sezvakangoita... Mashoko acho haambofi; ari kufamba achitenderera nekutenderera nyika, parekodhi, uye rimwe zuva ndinofanira kusangana nawo zvekare. Ndinocherechedza izvi, Ishe, uye ndinozvitura nekurevesa kwakadzama kwazvo.

¹⁴⁶ Ndinonamata, Mwari vanodikanwa, manheru ano, kuitira mumwe nemumwe weava, vana veNyu. Uye, O Mwari, ndinovimba, kuti vhiki risati rapera, vacha—vachanzwisia; kuti muvhunzo, uyo wakakura kwazvo mupfungwa dzavo manheru ano, uchange wagadziriswa. Zviitei, Ishe.

¹⁴⁷ Pane vamwe pano vasingaKuzivei, Baba, seMuponesi, nazvino, kana zvichida havasati vambozadzwa neMweya Mutsvene. Dai uhwu hukava husiku hwacho.

¹⁴⁸ Ishe, hapana wandinogona kuzadza neMweya Mutsvene; hapanawo zvekare wandinogona kuponesa. Ndinogona bedzi kuvaudza zvaMakataura, “Vakaropafadzwa avo vane nzara nenyota yekururama, nokuti vachazadzwa.” Uye ndinonamata, Mwari, kuti Muchasika nzara huru mumoyo yavo.

Vazhinji, Ishe, vanofanira kuve vaine nzara; ko vangatyaire sei mazana emamaera aya, kuburikidza nemuchando nezvimwe zvose, uye nepamakomo anonaya, uye nekuyambuka magwenga, kuti vauye kukanzvimbo kadiki kekare kagere pano pakona! Ipapo ndinofunga zvekare, Makati, “Apo pane Mutumbi, zvapungu zvinenge zvakaungana.” Tipei zvokudya, Ishe, paMana yeNyu yeKudenga. Ipai kumweya yedu izvo chaizvo zvatinoda. Tiri kunzwa nyota yeNyu, Baba. Tiri mumaoko eNyu zvino.

¹⁴⁹ Itai kuti Mweya Mutsvene mukuru wakaburuka pagomo pane rimwe zuva kumusoro uko, ndinonamata kuti Agozadza moyo wese uri muno nekunaka kwaKe netsitsi, pamwe nekunzwisia. Tinocherechedza, Baba, kuti ndizvo zvatinoda, iko kunzwisia. Nokuti kana tisingazine zvatiri kuita, saka tinozoziva sei kuti tinozviita sei? Asi tinofanira kuva nekunzwisia. SaDhanieri akati, akava “nekunzwisia kuburikidza neZvinyorwa zvemuporofita Jeremia.” Uye, Baba, tine kunzwisia kuburikidza neZvinyorwa zveMweya Mutsvene, sekuZvizarura kwaAchaziita kwatiri munguva ino. Ipaiwo kwatiri, Ishe, zvishuvo zvatinazvo zvokuda iMi. Muhunyoro tinokumbira izvi, Baba, kuitira kubwinya kweNyu, nemuZita raJesu Kristu.

¹⁵⁰ Zvino nemisoro yedu yakakotamiswa. Apo hanzvadzi yedu ichiridza urwu, "Achandipa nyasha nekubwinya, uye woenda nenzi nzira yose." Ndinoda kuti ugonamata chinyararire zvino uye wokumbira Baba veKudenga kuti Vakupe, manheru ano, izvo zvaunoshaya.

¹⁵¹ Hama mudikanwi, hanzvadzi mudikanwi, iYe anongori pedyo newe sezvakaita ruoko rwako kwauri. Iwe, wakanditenda mune—mune zvime zvinhu, nditendei mune izvi. Ari pano kukupa chero chipi zvacho chaunoshaiwa.

¹⁵² O, kwemavhiki mashoma apfuura ndanga ndiine nzara kwazvo, ndiine nyota kwazvo, ndichishuva kumba zvakanyanya, kuti ndikuonei. Ndicho chikonzero ndakati, "Billy, ngatiendei kumba."

Meda akati, "Uri kudirei kudzokera ikoko, munyika iyo inotonhora zvekare, Bill? Unogara uchiva nepahuro panorwadza nezvime zvose. Unogara nguva dzose uchibuda, nemusoro unotonhora, uye unenge washoshoma, uye uchitadza kana nekutaura."

¹⁵³ Ini ndikati, "Zvakanaka, handizivi." Ndakati kwaari... Ndiri kuona shawmari yangu, Charlie Cox, yakagara kumashure uko. Ndikati, "Ndiri kushuva kunzwa Charlie achiti, 'Tsindi diki iyo yakwira mumuti uyo uri uko.' Ndinonzwa nzara kwazvo yekuzvinzwa izvozvo." Ndi—ndinongoda ku—ndinoda kunge ndiri pamunenge muri.

¹⁵⁴ Ndinoziva Hama yangu Banks yakarwara kwazvo. Uye ndakaona chiratidzo chavo, pano kwete nguva yakareba yapfuura, uye vakanga vakarara nemusana wavo. Uye ndinoziva kuti vakasvika pedyo nekuenda vachibva patiri, nguva pfupi yapfuura. Apo pandinotarisa vakasiyana-siyana venyu...

¹⁵⁵ Ndakapinda mamwe manheru, mumusangano weChristian Business Men, uye wepasi rose. "Baba" Shakarian vekare, baba vaDemos, vaiwanzogarapo vachiramba vakatarisa kusvika ndapinda, ipapo vaibva vanyemwerera, uye nekakundibhaihbaisa kavaibva vaita kwandiri. Vakanga vasisipo ipapo. Vakaenda.

Zvadaro ndakatozouya kumhuri iyoyo, neZVANZI NAJEHOVHA, mwanasikana wavo ari kuzofawo, zvekare. Florence, ndakamuona muchiratidzo, ndakamuona achienda. Uye ndinoziva kuti ari kuenda. Zvino ndikati, "Namatai, ingtonamatai. Munoziva pane... Muporofita imwe nguva akaudzwa kuti aende kunoudza mambo kuti aise imba yake muhurongwa. Zvino iye akanamata, uye Ivo vakachengeteda hupenyu hwake, mamwezve makore gumi nemashanu." Ndikati, "Namatai."

¹⁵⁶ Asi, unotarisa, zvino ini—ini ndadzoka... Ndakagara nechekuno murestorandi, nerimwe zuva, ndichidya. Mumwe

murume akafamba ndokuuya kwandiri, akati, “Hausi Billy Branham here?”

Ndikati “Hongu.”

¹⁵⁷ Iye zvichida akanga asingandizive, nokuda kweichi chaiva pamusoro apo pane mhanza mumusoro wangu. Ndakange ndakapfeka kachidimbu aka kadiki kevhudzi, kuitira kuti ndisave nepahuro panorwadza mumusangano uno.

Akafamba ndokuuya kwandakanga ndiri, akati, “Ndafunga kuti ndinokuziva, Billy.”

Ini ndikati, “Hongu.” Ndikati, “Ndiwe ani?”

Akati, “Ndini John Warman.”

Ini ndikati, “Ko Zip akadini?”

Iye akati, “Billy, akafa.” Uh!

¹⁵⁸ Ndakanga ndichiuya zasi ndichipfuura nemumahofisi edunhu; ndakadzika kunobhadhara mitero yangu. Ndichiuya zasi ndichipfuura nemumahofisi edunhu, zvino mumwe mudzimai ndokudanidzira kwandiri, uye akati, “Wanga uchiziva here kuti John akaenda?” Kana, rimwe zita. Rinogona kunge rainge risiri John; Ed, kana rimwewo. Zvino ini ndikati... Ndakanga ndisingazive mudzimai uyu. Ndakanzwa kunyara. Zvino ndokuzoona kuti, ndakanga ndisingazive kuti aiva ani.

Iye akati, “Unorangarira here humwe husiku hutema apo rwizi rwakanga rwakafashukira kudarika mahombekombe kunze kuno, uye dzimba dzichiyeredzwa, uko mumugwagwa unonzi Chestnut, uye iwe ukaisa hupenyu hwako panjodzi kuti upinde mune imwe nzvimbo kunoburitsa kunze mumwe mudzimai nevana vadiki?”

Ini ndikati, “Ndiwe iyeye?”

¹⁵⁹ Iye akati, “Ndi—ndini mudzimai wacho.” Akatanga kuchemera mucheche wake; munoziva nyaya yangu. Mudzimai akati, “Iye uya wandaiti ‘mucheche wangu,’ akaroorwa uye ava nemhuri.” Maona? Zvino heunoi uyu, achembera uye musoro wachena; uye nenliwo pano, zvekare.

¹⁶⁰ Mumwe nemumwe, makadhi edu anenge achibviswa kubva pasherufu, tingati. Uye patinova nemisangano, ndinoshaya *uyu*, ndoshaya *uyo*. Tese tinofanira kusvika patichashaikwa, rimwe remazuva ano.

Asi, hama, hanzvadzi, pane Nzvimbo yekuongana. Ngativei nechokwadi zvino chekuti takarurama. Mungadaro here? Musarega kuti kunzwisisa kwedu kwose pamusoro paMwari, nezvimwe zvakadaro, zviendere pasina. Ngatitendei.

¹⁶¹ Baba, vari mumaoko eNyru. Ini ndiri mumaoko eNyru, Ishe. Tiri pano mukukumikidzwa zvino, tisati tatanga musangano uri kuuya uchatanga mangwana manheru. Mungatibatsirewo here, Ishe? Dai yedu—dai hurukuro yedu yagara nguva dzose

iri paMuri! Dai moyo yedu nepfungwa dzedu zvagara paMuri, uye iMi makati Muchaticheneta tiri murugare rwakakkwana. Zvakanyorwawo zvekare muBhaibheri, “Musazembera pakunzwisia kwenyu.” O Mwari, hatidi kunzwisia kwedu; tinoda kunzwisia kweNyu. Kupeiwo kwatiri, O Mwari. Uye dai rumutsiriro rwauya mumoyo yedu kusvikira boka iri revanhu rinenge rangova moyo mumwe chete uye nemuhumwe. Zviitei, Baba. Ipai zvinhu izvi, apo patiri kunamata muZita rajesu Kristu.

Dakara mweya wangu wakabvutwa wawana
Zororo mhiri kwerwizi.

Mumuchinjikwa, mumuchinjikwa,
Muve kwangu kubwi- . . . (tisimudzei maoko
enyu) . . . nokusingaperi;

Dakara mweya wangu wakabvutwa wawana
Zororo mhiri kwerwizi.

Jesu, ndichengeteiwo mumuchinjikwa,
Pane chitubu chinokosha,
Chepachena kune . . . (hongu, Ishe,
chebachena) . . . hova inopodza,
Inoyerera kubva pachitubu cheKarivhari.

Mumuchinjikwa, mumuchinjikwa,
Muve nekubwinya kwangu nokusingaperi;
Dakara mweya wangu wakabvutwa wawana
Zororo mhiri kwerwizi.

¹⁶² [Hama Branham vanotanga kuimba mahon'era *Pedyo Nemuchinjikwa*—Mupepeti] Oo Mwari! Kana paine mumwe wenyu anonzwa kuti angada kuuya kuno wopfugama pasi paaritari, kana uchingoda hako kuuya, woti, “Handisi panzvimbo yandinofanira kunge ndiri, Ishe. Ndi—ndinoda kuzvikumikidza patsva zvekare. Ndinoda kuzviita manheru ano, Ishe.” Wakasununguka kuuya. Tinenge tiri pano kuti tinamate newe. [Hama Branham vanoenderera mberi kuimba mahon'era *Pedyo Nemuchinjikwa*.]

Mumuchinjikwa, mumuchinjikwa,
Oo, muve nekubwinya kwangu nekusingaperi;
Dakara mweya wangu wakabvutwa wawana
Zororo mhiri kwerwizi.

Jesu, ndichengeteiwo pedyo nemuchinjikwa,
Pane chitubu chinokosha,
Chepachena kune vese, hova inopodza,
Inoyerera kubva pachitubu cheKarivhari.

Mumuchinjikwa, mumuchinjikwa,
Muve nekubwinya kwangu nekusingaperi;
Dakara mweya wangu wakabvutwa wawana
Zororo mhiri kwerwizi.

¹⁶³ Ngatingonamatei, mumwe nemumwe nenzira yako zvino. Chingo—chingokanganwa zvenguva. Ngatingokotamisai misoro yedu muHupo hwaKe. Mudzimai mudiki uyu pano, ari kudanidzira, “Ndinokudai, Jesu!” Unorangarira here pawakaponeswa, makore akawanda apfuura, unorangarira kuti izvozvo zvaitapira sei kwauri? Achiri kungotapira zvimwe chete manheru ano. Ngatinamatei, munhu wese nenzira yako zvino. Ngatingo—ngatingozvikumikidzei tose pachedu kuna Mwari, kungozvikumikidza pachedu kunaShe.

¹⁶⁴ Ishe Jesu vanodikanwa . . . [Chibenga chisina chinhu patepi—Mupepeti]

Hova yekunyaradzwa kwangu kwese,
 Muri zvinopfuura hupenyu kwandiri,
 Ndianiko wandinaye panyika kunze kweNyus?
 Kana kuti ndianiko Kudenga asi iMi?

Mwari vanodikanwa, tinonamata zvino kuti tsitsi nenyasha dzeNyus zvizotumirwa pane mumwe nemumwe wedu, Ishe. Tiri pano takakomberedza aritari. Vazhinji vatacda kuuya kuno; Muchasangana navo pazvigaro zvavo. Chero chipi chatinopa, Ishe, Munobvuma kuchigamuchira. Kana tikangoKupai nguva yedu, Muchaigamuchira; tarenda, Mucharigamuchira. Asi, Ishe Mwari, manheru ano tiri kupfuirira izvozvo, tiri kupa izvo zvose zvatiri. Zvose zvandiri, zvose zvandinotarisira kunge ndiri, zvose zviri maMuri, Ishe. Tinonamata kuti Muchatora iyi, minamato yedu, ipinde mumoyo meNyus, Ishe, uye mugotipa kubva pakadzika pakuru peMweya Mutsvene, kuti hupenyu hwedu hushandurwe. Nokuti, tiri kuona kuti tave pedyo nekumagumo zvino. Hapangave nenguva yakanyanya kureba. Uye patiri kuona vadikanwa vedu vachienda, zuva nezuva, vadiki nevakuru, tinoziva kuti nenguva isipi rwunofanira kugogodzawo pamukova wedu. Uye manheru ano, Ishe, apo tichiri mupfungwa dzedu dzakakwana, takagara pano, kana kuti takafugama pano, takamira pano, chingava chinhano chipi zvacho chatiri machiri, tigamuchirewo, Ishe Mwari.

¹⁶⁵ Nditoreiwo, Ishe. Handisi chinhu, asi chero zvingavei zvandiri, Ishe, kana Mukagona kuwana chingashandisika kubva mandiri, ndinozvikumikidza pachangu kwaMuri.

¹⁶⁶ Ndinonamata, Mwari vanodikanwa, ndichiitira mumwe nemumwe weava. Vanhu ava vanodikanwa avo vandakamiririra kure uko mumakomo ari muArizona ndikachema nekuda kwavo, zvino pano vakafugama vakakomberedza aritari pamwe chete nesu manheru ano, vachinamata, tichikumikidza hupenyu hwedu. TinoKudai, Baba, kupfuura hupenyu hwedu pachedu. TinoKudai kupfuura mhuri dzedu. TinoKudai kupfuura mudzimai, vana, baba, amai, hanzvadzi, mukoma, murume, mudzimai. TinoKudai, Ishe Jesu. Itai kuti izvozvo zvive zvamazvirokwasvo kwazvo mumoyo yedu, Ishe. Dururai mukati

mafuta emufaro, vhiki rino, Ishe, mumunhu wedu wemukati. Tishambei, kugezwa neShoko, nemvura dzeShoko, muchigovera kwatiri Chokwadi.

¹⁶⁷ Vazhinji pano manheru ano, Ishe, uye nevachange vari pano, avo vakavhiringika pazvidzidzo izvi zvakakosha. Oo Mwari, zarurai chitubu chiya muimba yaMwari, che—chekutichenesa. Ndinonamata, Mwari, kuti Muchatigeza pamwe nekutichenesa muRopa reNyu, uye motiita zvisikwa zvitsva. Uye mutipewo nyasha nesimba, kuti tiunze Shoko reChokwadi muchizaruro chaRo chaMwari cheMunhu waJesu Kristu.

Dai Akaonekwa pamberi pedu, Ishe. Dai Akauya kuzopodza hurwere hwedu, oregerera zvivi zvedu, ozadza moyo yedu ine nzara nenhau dzakanaka dzemufaro mukuru, Evhangeri yakaratidzwa muhupenyu hwedu.

Ropafadzai mufudzi wese, muimbisi wese wenziyo, mudzidzisi wese weSunday school. Tiropafadzei tose, pamwe chete, Ishe, nokuti chokwadi tinoKudai. Uye zvino tave veNyu, Ishe, mukumikidzo iyi. NemuZita raJesu Kristu, tishandisei zvino maererano nekuda kweNyu Momene.

Kutenda kwangu kunotarisa kwaUri,
Iwe Gwayana reKarivhari,
O Muponesi weKudenga;
Zvino ndinzweiwo apo ndiri kunamata,
Bvisai zvivi zvangu zvose zviende kure,
Oo itai kuti kubva muzuva ranhasi
Ndive weNyu zvachose!

Munochida here? Ngatiimbei zvekare.

Apo muninga nhema dzechupenyu ndofamba,
Uye kusuwa kwakandipoteredza,
Oo, ivai Imi Mutungamiri wangu;
Rairai rima kuti rive chiedza,
Pukutai misodzi yekusuwa ibve,
Kana kunditendera kuti ndirasike
Ndichibva paMuri ndatsauka.

Zvinokuitai kuti munzwe zvakanaka here? [Ungano inoti, “Ameni.”—Mupepeti] Vangani vanofarira kuimba nziyo dzekare idzi? [“Ameni.”] Ndinongodzida. Hamudzidewo here?

Oo, tiri kufora tichienda kuZioni,
Rakaisvonaka, rakaisvonaka Zioni;
Tiri kufora tichikwira kumusoro kuZioni,
Riya Guta raMwari rakaisvonaka.

Oo, tiri kufora tichienda kuZioni,
Oo, rakaisvonaka, rakaisvonaka Zioni;
Tiri kufora tichikwira kumusoro kuZioni,
Riya Guta rakaisvonaka raMwari.

Huyai, tose avo vanoda Ishe,
 Uye regai mifaro yedu izivikanwe,
 Tobatana murwiyo muhumwe hunotapira,
 Tobatana murwiyo muhumwe hunotapira,
 Zvino ipapo tokomberedza Chigaro,
 Zvino ipapo tokomberedza . . .

Zvino, ngatisimukei zvino apo patiri kurwuimba.
 Kwazisanai maoko mumwe nemumwe.

Tichifora kuenda kuZioni,

Muropafadzwe, hanzvadzi! Muropafadzwe, hanzvadzi!
 Muropafadzwe, hama! Muropafadzwe, hanzvadzi! [Hama Branham vanoenderera mberi nekukwazisa vanhu—Mupepeti]

Riya Guta rakaisvonaka raMwari.

Ngatisimudzei maoko edu zvino kuna Mwari.

Oo, tiri kufora tichienda kuZioni,
 Rakaisvonaka, rakaisvonaka Zioni;
 Tiri kufora tichikwira kumusoro kuZioni,
 Riya Guta rakaisvonaka raMwari.

Oo, tiri kufora tichienda kuZioni,
 Oo, rakaisvonaka, rakaisvonaka Zioni;
 Tiri kufora tichikwira kumusoro kuZioni,
 Riya Guta rakaisvonaka raMwari.

Hazvikuitei here kuti munzwe zvakanaka kwazvo?
 [Ungano inofara—Mupepeti] Ini zvangu, ini zvangu! Oo, ngatingosimudzai maoko edu uye tingoMurumbidza nenzira yedu.

¹⁶⁸ Ishe Jesu, ndiMi Ruva reSharoni, Hapa yemuMupata, Nyeredzi yeMambakwedza inoPenya, Akanakisisa wezviuru gumi kumoyo wangu. Ndimi Rwizi rwekunyaradzwa kwangu kwose, munopfuura hupenyu kwandiri! Tinokudai kwazvo iMi! Tinzweiwo, O Ishe. TinoKutendai kwazvo! Oo! [Chibenga chisina chinhu patepi—Mupepeti] TinoKurumbidzai kwazvo! Ropafadzai ava, Ishe naMuponesi wedu anokosha! Ipai zvinhu izvi, Ishe. Zvipei. [Hama Branham neungano vanoenderera mberi nekunamata nekurumbidza Mwari.]

Pedyo nemuchinjikwa,
 Muve nekubwinya kwangu nokusingaperi;
 Dakara mweya wangu wakabvutwa wawana
 Zororo mhiri kwerwizi.

¹⁶⁹ Hamhenowo, neimwe nzira, ndiri kungonzwa kuti tichava . . . Pane chimwe chinhu chakatimirira mberi kwedu. Zvino, ingorangarirai, ndinotenda kuti ndiri kuporofita. Mufaro mukuru uri mberi. Zvitendei. Ndizvozvo chaizvo. Moyo yakawanda yakasuwa ichaitwa kuti . . . Zvakavanzika zvikuru zvichajekeswa, uye vanhu vakasuwa vachashandurwa kuve nemufaro. [Ungano inofara—Mupepeti]

Pedyo nemuchinjikwa, mumuchinjikwa,
 Muve nekubwinya kwangu nokusingaperi;
 Dakara mweya wangu wakabvutwa wawana
 Zororo mhiri kwerwizi.

¹⁷⁰ SaJohane wekare, paakange akwegura zvakanyanya zvekutadza kuparidza, aingogara odanidzira, vanondiudza, nesimba rake rose, “Vana vadiki, dananai!” Dananai. Regai kutendera chimwe chinhu kuti chiye pakati penyu, maona. Chengetai zvose, zvinhu zvose kubva pane... Hongu, hazvinei nekuti chii, tarisanai nazvo. Tiri munzira yokuenda kuNinevhe. Maona? Musakwire chikepe chiye chekare chekuTashishi, chinokubvisai pakuva pamwe chete nevamwe. Ngatinyatsofambai tichikwira nekarwizi kemaropafadzo aMwari. Ndinotenda tichazova nazvo. Ndinotenda Baba vedu.

¹⁷¹ Muri kunzwa zviri nani zvino here, hanzvadzi? Zvakanaka. Ndiyo nzira yandinoda kuona vana vachiberekwa nayo, vachiuya kusvika zvaita. [Hanzvadzi inoenderera mberi nekunamata uye nekufara—Mupepeti]

Ndinogona kungofunga makore apfuura, ipo panzvimbo dzino chaipo, kuti zviuru zvingani zvakaberekwa muHumambo hwaMwari, ipo panzvimbo pano. Ko taimbozivei zvedu, apo paya pataive takamira pano tine masenzi makumi masere muhomwe medu, ekuti tivake nawo chechi! Oo, Akati, “Ini Jehovha ndakaidyara; Ndichaidiridzira masikati neusiku.” Uye iYe akazviita. Akazviita.

Mwari vakuropafadzei. Zvino apo patinokotamisa misoro yedu...

¹⁷² Zvino, mangwana manheru, rangarirai, shumiro dzichaitirwa uko muodhitoriyamu yekuchikoro kuno. Uye kana... Tichava nemumwe munhu anenge akamirira ari pano zvino, kuti aratidze vanhu kuti vanoenda sei ikoko, nokuti vatsva vachange vachiuya.

¹⁷³ MunoMuda, itai, “Ameni.” [Ungano inoti, “Ameni.”—Mupepeti] Oo, haAshamise here? [“Ameni.”]

¹⁷⁴ Ndakange ndakamira zasi kuno pamahombekombe, uye ndichiimba rwiyo rwuya rwekare:

Pamahombekombe eJorodhani ane mafashama
 ndakamira,

Pafungei, ave makore makumi matatu apfuura, makumi matatu nematatu, makore makumi matatu nematatu apfuura.

Uye ndokanda ziso rine kushuvira,
 Kunyika yeKenani yakanaka uye ine mufaro,
 Uko kune nhaka yangu.

Uye vazhinji vandakabhabhatidza, madekwana iwayo, vari mhiri ikoko zvino. Paya, pavakamira ipapo vakapupurira Nyeredzi iya yeMambakwedza ichiburuka kubva kumatenga,

ichitenderera-tenderera kudaro, ndokuti, “SaJohane Mubhabhatidzi akatumwa kuti aunze, kufanotungamira kuuya kwaKristu kwekutanga, Mharidzo yako ichafanotungamira Kuuya kwechipiri.” Ko zvaizombofungwa sei? Asi, ose Mashoko aMwari ndeechokwadi, ose Mashoko aMwari. Tiri kurarama muHupo hwaMambo mukuru. Mwari vakuropafadzei.

¹⁷⁵ Apo tiri kukotamisa misoro yedu, ndichakumbira Hama Neville, mufudzi wedu anokosha, kuti vauye kuno vazotiparadzanisa nomunamato. Mwari vakuropafadzei, Hama Neville.



MUNHU ARI KUTIZA KUBVA MUHUPO HWASHE SHO65-0217
(A Man Running From The Presence Of The Lord)

Mharidzo iyi neHama William Marrion Branham, yakaparidzwa kwokutanga neChirungu Chitatu manheru, 17 Kukadzi, 1965, paBranham Tabhenakeri muJeffersonville, Indiana, U.S.A., yakazotorwa kubva patepi yakarhekedowa ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice of God Recordings.

SHONA

©2020 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org